

摘藻堂四庫全書薈要

史部

欽定四庫全書薈要卷六千八百七十六

史部

明史卷二百八十三

大學士張廷玉等奉 敕修

列傳第一百七十一

儒林二

陳獻章

李承箕  
張詡

婁諒

夏尚樸

賀欽

陳茂烈

湛若水

蔣信等

鄒守益

于善等

錢德洪

徐愛等

王畿

王艮等

歐陽德

族人瑜

羅洪先

程文德

吳悌

子仁度

何廷仁

劉邦采  
魏良政等

王時槐

許孚遠

尤時熙

張後覺等

鄧以讚

張元忬

孟化鯉

孟烱

來知德

鄧元錫

劉元卿  
章潢

陳獻章字公甫新會人舉正統十二年鄉試再上禮部

不第從吳與弼講學居半載歸讀書窮日夜不輟築陽  
春臺靜坐其中數年無戶外跡久之復游太學祭酒邢  
讓試和楊時此日不再得詩一首驚曰龜山不如也颺  
言於朝以為真儒復出由是名震京師給事中賀欽聽  
其議論即日抗疏解官執弟子禮事獻章獻章既歸四  
方來學者日進廣東布政使彭韶總督朱英交薦召至  
京令就試吏部屢辭疾不赴疏乞終養授翰林院檢討  
以歸至南安知府張弼疑其拜官與與弼不同對曰吳

先生以布衣為石亨所薦故不受職而求觀祕書冀在  
開悟主上耳時宰不悟先令受職然後觀書殊戾先生  
意遂決去獻章聽選國子生何敢偽辭釣虛譽自是屢  
薦卒不起獻章之學以靜為主其教學者但令端坐澄  
心於靜中養出端倪或勸之著述不答嘗自言曰吾年  
二十七始從吳聘君學於古聖賢之書無所不講然未  
知入處比歸白沙專求用力之方亦卒未有得於是舍  
繁求約靜坐久之然後見吾心之體隱然呈露日用應

酬隨吾所欲如馬之卸勒也其學灑然獨得論者謂有  
鳶飛魚躍之樂而蘭谿姜麟至以為活孟子云獻章儀  
幹修偉右頰有七黑子母年二十四守節事之至孝母  
有念輒心動即歸弘治十三年卒年七十三萬厯十二  
年從祀孔廟追謚文恭門人李承箕字世卿嘉魚人成  
化二十二年舉鄉試往師獻章獻章日與登陟山水投  
壺賦詩縱論古今事獨無一語及道久之承箕有所悟  
辭歸隱居黃公山不復仕與兄進士承芳皆好學稱嘉

魚二李卒年五十四張詡字廷實南海人亦師事獻章  
成化二十年舉進士授戶部主事尋丁憂累薦不起正  
德中召為南京通政司叅議一謁孝陵即告歸獻章謂  
其學以自然為宗以忘己為大以無欲為至卒年六十  
婁諒字克貞上饒人少有志絕學聞吳與弼在臨川往  
從之一日與弼治地召諒往視云學者須親細務諒素  
豪邁由此折節雖掃除之事必身親之景泰四年舉於  
鄉天順末選為成都訓導尋告歸閉門著書成日錄四

十卷三禮訂訛四十卷謂周禮皆天子之禮為國禮儀  
禮皆公卿大夫士庶人之禮為家禮以禮記為二經之  
傳分附各篇如冠禮附冠義之類不可附各篇者各附  
一經之後不可附一經者總附二經之後其為諸儒附  
會者以程子論黜之著春秋本意十二篇不採三傳事  
實言是非必待三傳而後明是春秋為棄書矣其學以  
收放心為居敬之門以何思何慮勿忘勿助為居敬要  
旨然其時胡居仁頗譏其近陸子後羅欽順亦謂其似



禪學云子忱字誠善傳父學女為寧王宸濠妃有賢聲  
嘗勸王母反王不聽卒反諒子姓皆捕繫遺文遂散軼  
矣門人夏尚樸字敷夫廣信永豐人正德初會試赴京  
見劉瑾亂政慨然嘆曰時事如此尚可干進乎不試而  
歸六年成進士授南京禮部主事歲饑條上救荒數事  
再遷惠州知府授劾歸嘉靖初起山東提學副使擢南  
京太僕少卿與魏校湛若水輩日相講習言官劾大學  
士桂萼語連尚樸吏部尚書方獻夫白其無私尋引疾

歸早年師諒傳主敬之學常言纔提起便是天理纔放下便是人欲魏校亟稱之所著有中庸語東巖文集王守仁少時亦嘗受業於諒

賀欽字克恭義州衛人少好學讀近思錄有悟成化二年以進士授戶科給事中已而師事獻章既歸肖其像事之弘治改元用閣臣薦起為陝西參議檄未至而母死乃上疏懇辭且陳四事一謂今日要務莫先經筵當博訪真儒以資啟沃二薦檢討陳獻章學術醇正稱為

大賢宜以非常之禮起之或俾參大政或任經筵以養  
君德三內官職掌載在祖訓不過備灑掃司啟閉而已  
近如王振曹吉祥汪直等或參預機宜干政令招權納  
寵邀功起釁或引左道進淫巧以蕩上心誤國殃民莫  
此為甚宜慎飭將來內不使干預政事外不使鎮守地  
方掌握兵權四興禮樂以化天下陛下紹基之初舉行  
朱子喪葬之禮而頽敗之俗因仍不改乞申明正禮革  
去教坊俗樂以廣治化疏凡數萬言奏入報聞正德四

年劉瑾括遼東田東人震恐而義州守又貪橫民變聚衆劫掠顧相戒曰毋驚賀黃門欽聞之急諭禍福以身任之亂遂定欽學不務博涉專讀四書六經小學期於反身實踐謂為學不必求之高遠在主敬以收放心而已卒年七十四天啟初追謚恭定子士諮鄉貢士嘗陳十二事論王政不報終身不仕

陳茂烈字時周莆田人年十八作克己錄謂顏之克己曾之日省學之法也弘治八年舉進士奉使廣東受業

陳獻章之門獻章語以王靜之學退而與張訓論難作  
靜思錄尋授吉安府推官考績過淮寒無絮衣凍幾殆  
入為監察御史袍服朴陋乘一疲馬人望而敬之以母  
老終養供母之外不辦一惟治畦汲水身自操作太守  
聞其勞進二卒助之三日遣之還吏部以其貧祿以晉  
江教諭不受又奏給月米上書言臣素貧食本儉薄故  
臣母自安於臣之家而臣亦得以自適其貧非有及人  
之廉盡己之孝也古人行傭負米皆以為親臣之貧尚

未至是而臣母鞠臣艱苦今年八十有六來日無多臣欲自盡心力尚恐不及上煩官帑心竊未安奏上不允母卒茂烈亦卒茂烈為諸生時韓文問莆田人物於林俊曰從吾謂彭時也又問曰時周且曰與時周語沉疴頃去其為所重如此

湛若水字元明增城人弘治五年舉於鄉從陳獻章游不樂仕進母命之出乃入南京國子監十八年會試學士張元禎楊廷和為考官撫其卷曰非白沙之徒不能

為此置第二賜進士選庶吉士入翰林院編修時王守仁在吏部講學若水與相應和尋丁母憂廬墓三年築西樵講舍士子來學者先令習禮然後聽講嘉靖初入朝上經筵講學疏謂聖學以求仁為要已復上疏言陛下初政漸不克終左右近侍爭以聲色異教蠱惑上心大臣林俊孫交等不得守法多自引去可為寒心亟請親賢遠奸窮理講學以隆太平之業又疏言日講不宜停止報聞明年進侍讀復疏言一二年間天變地震山

崩川湧人饑相食殆無虛月夫聖人不以屯否之時而後親賢之訓明醫不以深錮之疾而廢元氣之劑宜博求修明先王之道者日侍文華以裨聖學已遷南京國子監祭酒作心性圖說以教士拜禮部侍郎做大學衍義補作格物通志於朝歷南京吏禮兵三部尚書南京俗尚侈靡為定喪葬之制頒行之老請致仕年九十五卒若水生平所至必建書院以祀獻章年九十猶為南京之游過江西安福鄒守益守仁弟子也戒其同志曰



甘泉先生來吾輩當憲老而不乞言慎毋輕有所論辨  
若水初與守仁同講學後各立宗旨守仁以致良知為  
宗若水以隨處體驗天理為宗守仁言若水之學為求  
之於外若水亦謂守仁格物之說不可信者四又曰陽  
明與吾言心不同陽明所謂心指方寸而言吾之所謂  
心者體萬物而不遺者也故以吾之說為外一時學者  
遂分王湛之學湛氏門人最著者永豐李懷德安何遷  
婺源洪垣歸安唐樞懷之言變化氣質遷之言知止樞

之言求真心大約出入王湛兩家之間而別為一義垣  
則主於調停兩家而互救其失皆不盡守師說也懷字  
汝德南京太僕少卿遷字益之南京刑部侍郎垣字峻  
之温州府知府樞刑部主事疏論李福達事罷歸自有  
傳蔣信字卿實常德人年十四居喪毀瘠與同郡龔元  
亨善王守仁謫龍場過其地偕元亨事焉嘉靖初貢入  
京師復師湛若水若水為南祭酒門下士多分教至十  
一年舉進士累官四川水利僉事却播州土官賄寘妖

道士於法遷貴州提學副使建書院二廩羣髦士其中  
龍場故有守仁祠為置祠田坐擅離職守除名信初從  
守仁游時未以良知教後從若水游最久學得之湛氏  
為多信踐履篤實不事虛談湖南學者宗其教稱之曰  
正學先生卒年七十九時宜興周衝字道通亦遊王湛  
之門由舉人授高安訓導至唐府紀善嘗曰湛之體認  
天理即王之致良知也與信集師說為新泉問辨錄兩  
家門人各相非笑衝為疏通其旨焉

鄒守益字謙之安福人父賢字恢才弘治九年進士授  
南京大理評事數有條奏厯官福建僉事禽殺武平賊  
渠黃友勝居家以孝友稱守益舉正德六年會試第一  
出王守仁門以廷對第三人授翰林院編修踰年告歸  
謁守仁講學於贛州宸濠反與守仁軍事世宗即位始  
赴官嘉靖三年二月帝欲去興獻帝本生之稱守益疏  
諫忤旨被責踰月復上疏曰陛下欲隆本生之恩屢下  
羣臣會議羣臣據禮正言致蒙詰讓道路相傳有孝長

子之稱昔曾元以父寢疾憚於易簣蓋愛之至也而曾子責之曰姑息魯公受天子禮樂以祀周公蓋尊之至也而孔子傷之曰周公其衰矣臣願陛下弗以姑息事獻帝而使後世有其衰之嘆且羣臣援經證古欲陛下專意正統此皆為陛下忠謀乃不察而督過之謂忤且慢臣歷觀前史如冷褒段熲之徒當時所謂忠愛後世所斥以為邪媚也師丹司馬光之徒當時所謂欺慢後世所仰以為正直也後之視今猶今之視古望陛下不

各改過察羣臣之忠愛信而用之復召其去國者無使  
姦人動搖國是離間宮闈昔先帝南巡羣臣交章諫阻  
先帝赫然震怒豈不謂欺慢可罪哉陛下在藩邸聞之  
必以是為盡忠於先帝今入繼大統獨不容羣臣盡忠  
於陛下乎帝大怒下詔獄拷掠謫廣德州判官廢淫祠  
建復初書院與學者講授其間稍遷南京禮部郎中州  
人立生祠以祀聞守仁卒為位哭服心喪日與呂柟湛  
若水錢德洪王畿薛侃輩論學考滿入都即引疾歸久

之以薦起南京吏部郎中召為司經局洗馬守益以太  
子幼未能出閣乃與霍韜上聖功圖自神堯茅茨土階  
至帝西苑耕稼蠶桑凡為圖十三帝以為謗訕幾得罪  
賴韜受帝知事乃解明年遷太常少卿兼侍讀學士出  
掌南京翰林院夏言欲遠之也御史毛愷請留侍東宮  
被謫尋改南京祭酒九廟災守益陳上下交修之道言  
殷中宗高宗反妖為祥享國長久帝大怒落職歸守益  
天姿純粹守仁嘗曰有若無實若虛犯而不校謙之近

之矣里居日事講學四方從遊者踵至學者稱東廓先生居家二十餘年卒隆慶初贈南京禮部右侍郎謚文莊先是守仁主山東試堂邑穆孔暉第一後官侍講學士卒贈禮部右侍郎謚文簡孔暉端雅好學初不肯宗守仁說久乃篤信之自名王氏學浸淫入於釋氏而守益於戒懼慎獨蓋兢兢焉子善嘉靖三十五年進士以刑部員外郎恤刑湖廣矜釋甚衆擢山東提學僉事時與諸生講學萬厯初累官廣東右布政使謝病歸久之



以薦即家授太常卿致仕子德涵德溥德涵字汝海隆慶五年進士歷刑部員外郎張居正方禁講學德涵守之自若御史傅應禎劉臺相繼論居正皆德涵里人疑為黨出為河南僉事御史承風指劾之貶秩歸善服習父訓踐履無怠稱其家學而德涵從耿定理遊定理不答發憤湛思自覺有得由是專以悟為宗於祖父所傳始一變矣德溥由萬曆十一年進士歷司經局洗馬善從子德泳萬曆十四年進士官御史給事中李獻可請

預教太子斥為民德泳偕同官救之亦削籍家居三十年言者交薦光宗立起尚寶少卿歷太常卿魏忠賢用事乞休歸所司將為忠賢建祠德泳塗毀其募籍乃止錢德洪名寬字德洪後以字行改字洪甫餘姚人王守仁自尚書歸里德洪偕數十人共學焉四方士踵至德洪與王畿先為疏通其大旨而後卒業於守仁嘉靖五年舉會試徑歸七年冬偕畿赴廷試聞守仁訃乃奔喪至貴溪議喪服德洪曰某有親在麻衣布經弗敢有加

馬畿曰我無親遂服斬衰喪歸德洪與畿築室於場以終心喪十一年始成進士累官刑部郎中郭勛下詔獄移部定罪德洪據獄詞論死廷臣欲坐以不軌言德洪不習刑名而帝雅不欲勛死因言官疏下德洪詔獄所司上其罪已出獄矣帝曰始朕命刑官毋梏勛德洪故違之與勛不領敕何異再下獄御史楊爵都督趙卿亦在繫德洪與講易不輟久之斥為民德洪既廢遂周遊四方講良知學時士大夫率務講學為名高而德洪畿

以守仁高第弟子尤為人所宗德洪徹悟不如畿畿持  
循亦不如德洪然畿竟入於禪而德洪猶不失儒者矩  
矱云穆宗立復官進階朝列大夫致仕神宗嗣位復進  
一階卒年七十九學者稱緒山先生初守仁倡道其鄉  
隣境從游者甚衆德洪畿為之首其最初受業者則有  
餘姚徐愛山陰葉宗克朱節及應良盧可久應典董灝  
之屬愛字曰仁守仁女弟夫也正德三年進士官至南  
京工部郎中良知之說學者初多未信愛為疏通辨析

暢其指要守仁言徐生之溫恭葉生之沉潛朱生之明  
敏皆我所不逮愛卒年三十一守仁哭之慟一日講畢  
嘆曰安得起曰仁九泉聞斯言乎率門人之其墓所酹  
酒告之葉宗充字希淵正德十二年進士官至四川提  
學僉事朱節字守中正德八年進士為御史巡按山東  
大盜起顏神鎮蔓州縣十數驅馳戎馬間以勞卒贈光  
祿少卿應良字原忠仙居人正德六年進士官編修守  
仁在吏部良學焉親老歸養講學山中者將十年嘉靖

初還任伏闕爭大禮廷杖張璁黜翰林為外官良得山  
西副使謝病歸卒廬可久字一松程粹字養之皆永康  
諸生與同邑應典皆師守仁粹子正誼歷順天府尹應  
典字天彛進士官兵部主事居家養母不希榮利遁籍  
三十年在官止一考可久傳東陽杜維熙惟熙傳同邑  
陳時芳陳正道惟熙以克己為要嘗曰學者一息不昧  
則萬古皆通一刻少寬即終朝欠缺卒年八十餘時芳  
博覽多聞而歸於實踐歲貢不仕正道為建安訓導年

八十餘猶徒步赴五峯講會其門人呂一龍永康人言  
動不苟學者咸宗之董灝字子壽海寧人年六十八矣  
游會稽肩瓢笠詩卷謁守仁卒請為弟子子穀官知縣  
亦受業守仁

王畿字汝中山陰人弱冠舉於鄉跌宕自喜後受業王  
守仁聞其言無底滯守仁大喜嘉靖五年舉進士與錢  
德洪並不就廷對歸守仁征思田留畿德洪主書院已  
奔守仁喪經紀塋事持心喪三年久之與德洪同第進

士授南京兵部主事進郎中給事中咸賢等薦畿夏言  
斥畿偽學奪賢職畿乃謝病歸畿嘗云學當致知見性  
而已應事有小過不足累故在官弗免干請以不謹斥  
畿既廢益務講學足跡遍東南吳楚閩越皆有講舍年  
八十餘不肯已善談說能動人所至聽者雲集每講雜  
以禪機亦不自諱也學者稱龍溪先生其後士之浮誕  
不逞者率自名龍谿弟子而泰州王艮亦受業守仁門  
徒之盛與畿相埒學者稱心齋先生陽明學派以龍谿



心齋為得其宗艮字汝止初名銀王守仁為更名七歲  
受書鄉塾貧不能竟學父竈丁冬晨犯寒後於官艮哭  
曰為人子令父至此得為人乎出代父役入定省惟謹  
艮讀書止孝經論語大學信口談說中理解有客聞艮  
言詫曰何類王中丞語艮乃謁守仁江西與守仁辨久  
之大服拜為弟子明日告之悔復就賓位自如已心折  
卒稱弟子從守仁歸里嘆曰吾師倡明絕學何風之不  
廣也還家製小車北上所過招要人士告以守仁之道

人聚觀者千百抵京師同門生駭異匿其車趣使返守  
仁聞之不悅艮往謁拒不見長跪謝過乃已王氏弟子  
遍天下率都爵位有氣勢艮以布衣抗其間聲名反出  
諸弟子上然艮本狂士往往駕師說上之持論益高遠  
出入於二氏艮傳林春徐樾樾傳顏鈞鈞傳羅汝芳梁  
汝元汝芳傳楊起元周汝登蔡悉樾字子直貴溪人舉  
進士歷官雲南左布政使沅江土酋那鑑反詐降樾信  
之抵其城下死焉詔贈光祿寺卿予祭葬任一子官春

字子仁泰州人聞良知之學日以朱墨筆識臧否自考  
動有繩檢尺寸不踰嘉靖十一年會試第一除戶部主  
事調吏部縉紳士講學京師者數十人聰明解悟善談  
說者推王畿志行敦實推春及羅洪先進文選郎中卒  
官年四十四發其篋僅白金四兩寮友棺斂歸其喪汝  
芳字維德南城人嘉靖三十二年進士除太湖知縣召  
諸生論學公事多決於講座遷刑部主事歷寧國知府  
民兄弟爭產汝芳對之泣民亦泣訟乃已報開元會罪

因亦令聽講入覲勸徐階聚四方計吏講學階遂大會  
於靈濟宮聽者數千人父艱服闋起補東昌移雲南屯  
田副使進參政分守永昌坐事為言官論罷初汝芳從  
永新顏鈞講學後鈞繫南京獄當死汝芳供養獄中鬻  
產救之得減戍汝芳既罷官鈞亦赦歸汝芳事之飲食  
必躬進人以為難鈞詭怪倡狂其學歸釋氏故汝芳之  
學亦近釋楊起元周汝登皆萬厯五年進士起元歸善  
人選庶吉士適汝芳以參政入賀遂學焉張居正方惡

講學汝芳被劾罷而起元自如累官吏部左侍郎拾遺  
被劾帝不問未幾卒天啟初追謚文懿汝登嶧人初為  
南京工部主事權稅不如額謫兩淮鹽運判官累官南  
京尚寶卿起元清修姱節然其學不諱禪汝登更欲合  
儒釋而會通之輯聖學宗傳盡採先儒語類禪者以入  
蓋萬厯世士大夫講學者多類此蔡悉字士備合肥人  
嘉靖三十八年進士授常德推官築郭外六隄以免水  
患擢南京吏部主事累官南京尚寶卿移署國子監嘗

請立東宮又極論礦稅之害有學行恬宦情仕五十年  
家食強半清操亮節淮西人宗之

歐陽德字崇一泰和人甫冠舉鄉試之贛州從王守仁  
學不應會試者再嘉靖二年策問陰詆守仁德與魏良  
弼等直發師訓無所阿竟登第除知六安州建龍津書  
院聚生徒論學入為刑部員外郎六年詔簡朝士有學  
行者為翰林乃改德編修遷南京國子司業作講亭進  
諸生與四方學者論道其中尋改南京尚寶卿召為太

僕少卿以便養復改南京鴻臚卿父憂服闋留養其母  
與鄒守益聶豹羅洪先日講學以薦起故官累遷吏部  
左侍郎兼學士掌詹事府母憂歸服未闋即用為禮部  
尚書喪畢之官命直無逸殿時儲位久虛帝惑陶仲文  
二龍不相見之說諱言建儲德懇請會有詔二王出邸  
同日婚德以裕王儲貳不當出外疏言曩太祖以父婚  
子諸王皆處禁中宣宗孝宗以兄婚弟始出外府令事  
與太祖同請從初制帝不許德又言會典醮詞主器則

曰承宗分藩則曰承家今裕王當何從帝不悅曰既云王  
禮自有典制如若言何不竟行冊立耶德即具冊立儀上  
帝滋不悅然終諒其誠婚亦竟不同日裕王母康妃杜氏  
薨德請用成化朝紀淑妃故事不從德遇事侃侃裁制諸  
宗藩尤有執或當利害衆相顏色戰德意氣自如當是時  
德與徐階聶豹程文德竝以宿學都顯位於是集四方名  
士于靈濟宮與論良知之學赴者五千人都城講學之會  
於斯為盛德器宇溫粹學務實踐不尚空虛晚見知于帝



將柄用而德遽卒贈太子少保謚文莊族人瑜字汝重亦學於守仁守仁教之曰常欲然無自是而已瑜終身踐之舉於鄉不就會試曰老親在三公不與易也母死廬墓側虎環廬嗥不為動歷官四川參議所至有廉惠聲年近九十而卒

羅洪先字達夫吉水人父循進士歷兵部武選郎中會考選武職有指揮二十餘人素出劉瑾門循罷其管事瑾怒罵尚書王敞敞懼歸部趣易奏循故遲之數日瑾敗敞乃謝循循歷知鎮江淮安二府徐州兵備副使咸

有聲洪先幼慕羅倫為人年十五讀王守仁傳習錄  
好之欲往受業循不可而止乃師事同邑李中傳其  
學嘉靖八年舉進士第一授修撰即請告歸外舅太  
僕卿曾直喜曰幸吾壻成大名洪先曰儒者事業有  
大于此者此三年一人安足喜也洪先事親孝父每  
肅容洪先冠帶行酒拂席授几甚恭居二年詔劾請  
告踰期者乃赴官尋遭父喪苦塊蔬食不入室者三  
年繼遭母憂亦如之十八年簡宮僚召拜春坊左贊

善明年冬與司諫唐順之校書趙時春疏請來歲朝

正後皇太子出御文華殿受羣臣朝賀時帝數稱疾

不視朝諱言儲貳臨朝事見洪先等疏大怒曰是料

朕必不起也降手詔百餘言切責之遂除三人名

洪先歸益尋求守仁學甘淡泊鍊寒暑躍馬挽強

考圖觀史自天文地志禮樂典章河渠邊塞戰陣

攻守下逮陰陽算數靡不精究至人才吏事國計

民情悉加意諮訪曰苟當其任皆吾事也邑田賦

多宿弊請所司均之所司即以屬洪先精心體察弊頓  
除歲饑移書郡邑得粟數十石率友人躬賑給流寇入  
吉安主者失措為畫策戰守寇引去素與順之友善順  
之應召欲挽之出嚴嵩以同鄉故擬假邊才起用皆力  
辭洪先雖宗良知學然未嘗及守仁門恒舉易大傳寂  
然不動周子無欲故靜之旨以告學人又曰儒者學在  
經世而以無欲為本惟無欲然後出而經世識精而力  
鉅時王畿謂良知自然不假纖毫力洪先非之曰世豈

有現成良知者耶雖與畿交好而持論始終不合山中  
有石洞舊為虎穴葺茅居之命曰石蓮謝客默坐一榻  
三年不出戶初告歸過儀真同年生主事項喬為分司  
有富人坐死行萬金求為地洪先拒不聽喬微諷之厲  
聲曰君不聞志士不忘在溝壑耶江漲壞其室巡撫馬  
森欲為營之固辭不可隆慶初卒贈光祿少卿謚文莊  
程文德字舜敷永康人初受業章懋後從王守仁遊登  
洪先榜進士第二授翰林編修坐同年生楊名劾汪鋐

事下詔獄謫信宜典史鉉罷量移安福知縣遷兵部員外郎父憂廬墓側終喪不入內起兵部郎中擢廣東提學副使未赴改南京國子祭酒母憂服闋起禮部右侍郎諳達犯京師分守宣武門盡納鄉民避寇者調吏部為左已改掌詹事府三十三年供事西苑所撰青詞頗有所規諷帝銜之會推南京吏部尚書帝疑文德欲遠已命調南京工部右侍郎文德疏辭勸帝享安靜和平之福帝以為謗訕除其名既歸聚徒講學卒貧不能殮

萬厯間追贈禮部尚書謚文恭

吳悌字思誠金谿人嘉靖十一年進士除樂安知縣調繁宣城徵授御史十六年應天府進試錄考官評語失書名諸生答策多譏時政帝怒逮考官諭德江汝璧沈馬歐陽衢詔獄貶官府尹孫樾等下南京法司尋得還職而停舉子會試悌為舉子求寬坐下詔獄出視兩淮鹽政海溢沒通泰民廬悌先發漕振之而後奏聞尋引疾歸還朝按河南伊王曲檎驕橫憚悌遺書稱為友悌

報曰殿下天子親藩非悌所敢友悌天子憲臣非殿下  
所得友王愈憚之夏言嚴嵩當國與悌鄉里嘗謁言衆  
見言新服宮袍競前譽之悌却立不進言問故徐曰俟  
談少間當以政請言為改容及嵩擅政悌惡之引疾家  
居垂二十年嵩敗起故官一歲中累遷至南京大理卿  
時吳獄胡松毛愷並以耆俊為卿貳與悌稱南都四君  
子隆慶元年就遷刑部侍郎明年卒悌為王守仁學然  
清修果介反躬自得為多萬厯中子仁度請卹吏部尚



書孫丕揚曰悌理學名臣不宜循常格遂用黃孔昭例  
贈禮部尚書諡文莊鄉人建祠與陸九淵吳澄吳與弼  
陳九川並祀曰五賢祠學者稱疏山先生仁度字繼跡  
萬厯十七年進士授中書舍人三王並封議起抗疏爭  
之久之擢吏部主事厯考功郎中稽勲郎中趙邦清被  
劾疑同官鄧光祚等嗾言路憤激力辨章下考功仁度  
欲稍寬邦清罰給事中梁有年遂劾仁度黨比時光祚  
引疾去而仁度代為文選御史康丕揚復劾仁度傾光

祚而代之詔改調之南京自邦清被論後言路訐不已  
都御史溫純志甚請定國是以剖衆疑而深為仁度惜  
仁度尋補南京刑部郎中擢太僕少卿進右僉都御史  
巡撫山西砥廉隅務慈愛與魏允貞齊名居四年以疾  
歸熹宗初起大理卿進兵部右侍郎復稱疾去再起工  
部左侍郎天啟五年魏忠賢以仁度與趙南星楊漣等  
善勒令致仕尋卒仁度名父子克自振勵鄒元標亟稱  
之

何廷仁初名泰以字行改字性之黃弘綱字正之皆雋  
都人廷仁和厚與人接誠意益溢而弘綱難近未嘗假  
色笑於人然兩人志行相準廷仁初慕陳獻章後聞王  
守仁之學於弘綱守仁征楠岡詣軍門謁遂師事焉嘉  
靖元年舉於鄉復從守仁浙東廷仁立論尚平實守仁  
歿後有為過高之論者輒曰此非吾師言也除新會知  
縣釋菜獻章祠而後視事政尚簡易士民愛之遷南京  
工部主事分司儀真權蕪湖稅不私一錢滿考即致仕

弘綱由鄉舉官刑部主事守仁之門從遊者恒數百浙東江西尤衆善推演師說者稱弘綱廷仁及錢德洪王畿時人語曰江有何黃浙有錢王然守仁之學傳山陰泰州者流弊靡所底極惟江西多實踐安福則劉邦采新建則魏良政兄弟其最著云邦采字君亮族子曉受業守仁歸語邦采遂與從兄文敏及弟姪九人謁守仁於里第師事焉父憂疏水廬墓免喪不復應舉提學副使趙淵檄赴試御史儲良才許以常服入闈不解衣檢

察乃就試得中式久之除壽寧教諭擢嘉興府同知棄  
官歸邦采識高明用力果銳守仁倡良知為學的久益  
敝有以揣摩為妙悟縱恣為自然者邦采每極言排斥  
焉文敏字直充父喪除絕意科舉嘗曰學者當循本心  
之明時見已過刮磨砥礪以融氣稟絕外誘徵諸倫理  
事物之實無一不慊於心而後為聖門正學非因勉不  
可得入也高談虛悟炫末離本非德之賊乎曉字伯光  
舉於鄉後為新寧知縣有善政良政字師伊守仁撫江

西與兄良弼弟良器良貴咸學焉提學副使邵銳巡按御史唐龍持論與守仁異戒諸生勿徃謁良政兄弟獨不顧深為守仁所許良政功尤專孝友敦朴燕居無惰容嘗曰不尤人何人不可處不累事何事不可為舉鄉試第一而卒良弼嘗言吾夢見師伊軼汗浹背其為兄憚如此良器字師顏性超穎絕人雖宗良知踐履務平實良弼自有傳良貴官右副都御史

王時槐字子植安福人嘉靖二十六年進士授南京兵

部主事歷禮部郎中福建僉事累官太僕少卿降光祿少卿隆慶末出為陝西參政張居正柄國以京察罷歸萬厯中南贛巡撫張岳疏薦之吏部言六年京察祖制也若執政有所驅除非時一舉謂之閏察時槐在閏察中羣情不服請召時槐且永停閏察報可久之陸光祖掌銓起貴州參政旋擢南京鴻臚卿進太常皆不赴時槐師同縣劉文敏及仕徧質四方學者自謂終無所得年五十罷官反身實証始悟造化生生之幾不隨念慮

起滅學者欲識真幾當從慎獨入其論性曰孟子性善之說決不可易使性中本無仁義則惻隱羞惡更何從生且人應事接物如是則安不如是則不安非善而何又曰居敬窮理二者不可廢一要之居敬二字盡之自其居敬之精明了悟而言謂之窮理即考索討論亦居敬中之一事敬無所不該敬外更無餘事也年八十四卒廬陵陳嘉謨字世顯與時槐同年進士為給事中不附嚴嵩出之外厯湖廣參政乞休歸專用力於學凡及



其門者告之曰有塘南在可往師之塘南時槐別號也  
年八十三卒

許孚遠字孟中德清人受學同郡唐樞嘉靖四十一年  
成進士授南京工部主事就改吏部已調北部尚書楊  
博惡孚遠講學會大計京朝官黜浙人幾半博鄉山西  
無一馬孚遠有後言博不悅孚遠遂移疾去隆慶初高  
拱薦起考功主事出為廣東僉事招大盜李茂許俊美  
禽倭黨七十餘輩以降錄功賚銀幣旋移福建神宗立

拱罷政張居正議逐拱黨復大計京官王篆為考功誣  
孚遠黨拱謫兩淮鹽運司判官厯兵部郎中出知建昌  
府暇輒集諸生講學引貢士鄧元錫劉元卿為友尋以  
給事中鄒元標薦擢陝西提學副使敬禮貢士王之士  
移書當路并元卿元錫薦之後三人並得徵由孚遠倡  
也遷應天府叅坐為李材訟冤貶二秩由廣東僉事再  
遷右通政二十年擢右僉都御史巡撫福建倭陷朝鮮  
議封貢孚遠請敕諭日本禽斬平秀吉不從呂宋國首

子訟商人襲殺其父孚遠以聞詔戮罪人厚犒其使福州饑民掠官府孚遠禽倡首者亂稍定而給事中耿隨龍御史甘士价等劾孚遠宜斥帝不問所部多僧田孚遠入其六於官又募民墾海壇地八萬三千有奇築城建營舍聚兵以守因請推行於南日彭湖及浙中陳錢金塘玉環南麂諸島皆報可居三年入為南京大理卿就遷兵部右侍郎改左調北部甫半道被論乞休疏屢上乃許又數年卒於家贈南京工部尚書後諡恭簡孚

遠篤信良知而惡夫援良知以入佛者知建昌與郡人  
羅汝芳講學不合及官南京與汝芳門人禮部侍郎楊  
起元尚寶司卿周汝登並主講席汝登以無善無惡為  
宗乎遠作九諦以難之言文成宗旨原與聖門不異以  
性無不善故知無不良良知即是未發之中立論至為  
明晰無善無惡之心體一語蓋指其未發時廓然寂然  
者而言之止形容得一靜字合下三語始為無病今以  
心意知物俱無善惡可言者非文成之正傳也彼此論

益齟齬而孚遠撫福建與巡按御史陳子貞不相得子貞督學南畿遂密諷同列拾遺劾之從孚遠遊者馮從吾劉宗周丁元薦皆為名儒

尤時熙字季美洛陽人生而警敏不羣弱冠舉嘉靖元年鄉試時王守仁傳習錄始出士大夫多力排之時熙一見嘆曰道不在是乎向吾役志詞章末矣已而以疾稍從事養生家授元氏教諭父喪除改官章邛一以致良知為教兩邑士亦知新建學入為國子博士徐階為

祭酒命六館士咸取法焉居常以不獲師事守仁為恨  
聞郎中劉魁得守仁之傳遂師事之魁以直言錮詔獄  
則書所疑時時從獄中質問尋以戶部主事權稅泮墅  
課足而止不私一錢念母老乞終養歸遂不出日以修  
己淑人為事足未嘗涉公府齋中設守仁位晨興必焚  
香肅拜來學者亦令展謁晚年病學者憑虛見而忽躬  
行甚且越繩墨自恣故其論議切於日用不為空虛隱  
怪之談卒於萬曆八年年七十有八學者稱西川先生

其門人孟化鯉最著自有傳張後覺字志仁荏平人父  
文祥由鄉舉官廣昌知縣後覺生有異質事親孝居喪  
哀毀三年不御內早歲聞良知之說於縣教諭顏鑰遂  
精思力踐偕同志講習已而貴谿徐樾以王守仁再傳  
弟子來為參政後覺率同志往師之學益有聞久之以  
歲貢生授華陰訓導會地大震人多傾壓死上官令署  
縣事救災扶傷人胥悅服及致仕歸士民泣送載道東  
昌知府羅汝芳提學副使鄒善皆宗守仁學與後覺同

志善為建願學書院俾六郡士師事焉汝芳亦建見泰  
書院時相討論猶以取友未廣北走京師南游江左務  
以親賢講學為事門弟子日益進凡吏於其土及道經  
荏平者莫不造廬問業巡撫李世達兩詣山居病不能  
為禮乃促席劇談飽蔬食而去平生不作詩不談禪不  
事著述行孚遠近學者稱之為弘山先生年七十六以  
萬厯六年卒其門人孟秋趙維新最著秋自有傳維新  
亦荏平人年二十聞後覺講良知之學遂師事之次其



問答語為弘山教言性純孝居喪五味不入口柴毀骨  
立杖而後起鄉人欲舉其孝行力辭之喪偶五十年不  
再聚嘗築垣得金一篋工人持之去維新不問家貧或  
併日而食超然自得亦以歲貢生為長山訓導年九十  
二無疾而終

鄧以瓚字汝德新建人張元忭字子蓋紹興山陰人二  
人皆生有異質又好讀書以瓚幼見父與人論學輒牽  
衣尾之間出語類夙儒父聞其勤學嘗局之斗室元忭

素羸弱母戒毋過勞乃藏燈幕中俟母寢始誦十餘歲  
時以氣節自負聞楊繼盛死為文遥誄之慷慨泣下父  
天復官雲南副使擊武定賊鳳繼祖有功已賊還襲武  
定官軍敗績巡撫呂光洵討滅之至隆慶初議者追理  
前失亡狀逮天復赴雲南對簿元忭適下第還萬里護  
行髮盡白已復馳詣闕下白寃當事憐之天復得削籍  
歸隆慶五年以瓚舉會試第一廷試第三授編修而元  
忭以廷試第一授修撰萬厯初座主張居正枋國政以

璚時有匡諫居正弗善也遺疾歸久之補原官旋引退  
詔起中允至中途復以念母返再起南京祭酒就擢禮  
部右侍郎復就轉吏部再疏請建儲且力斥三王並封  
之非中言中宮鍾愛元子其願早正春宮視臣民尤切  
陛下以厚中宮而緩冊立殆未諒中宮心況信者國之  
大寶建儲一事屢示更移將使詔令不信於天下非所  
以重宗廟安社稷也會廷臣多諫者事竟寢尋召為吏  
部右侍郎力辭不拜以璚登第二十餘年在官僅滿一

考居母憂不勝喪而卒贈禮部尚書諡文潔元忬嘗抗  
疏救御史胡濤又請進講列女傳於兩宮修二南之化  
皆不省萬厯十年奉使楚城還過家省母既行心動輒  
馳歸僅五日母卒元忬奉二親疾湯藥非口嘗弗進居  
喪毀瘠遵用古禮鄉人多化之服闋起故官進左諭德  
直經筵先是元忬以帝登極懇請復父官詔許給冠帶  
至是復申前請格不從元忬泣曰吾無以下見父母矣  
遂悵悵得疾卒天啟初追諡文恭以瓚元忬自未第時

即從王畿游傳良知之學然皆篤於孝行躬行實踐以  
瓚品端志潔而元忤矩矱儼然無流入禪寂之弊元忤  
子汝霖江西參議汝懋御史

孟化鯉字叔龍河南新安人孟秋字子成荏平人化鯉  
年十六慨然以聖賢自期而秋兒時受詩至桑中諸篇  
輒棄去不竟讀化鯉舉萬厯八年進士授戶部主事時  
相欲招致之辭不往權稅河西務與諸生講學河西人  
尸祝之南畿山東大饑奉命往賑全活多改吏部厯文

選郎中佐尚書孫鑰黜陟名籍甚時內閣權重每銓除  
必先白化鯉獨否中官請託復不應以故多不悅都給  
事中張棟先以建言削籍化鯉奏起之忤旨奪堂官俸  
謫化鯉及員外郎項復弘主事姜仲軾雜職閣臣疏救  
命以原品調外頃之言官復交章救帝益怒奪言官俸  
斥化鯉等為民既歸築書院川上與學者講習不輟四  
方從遊者恒數百人久之卒秋舉隆慶五年進士為昌  
黎知縣有善政遷大理評事去之日老稚載道泣留以

職方員外郎督視山海關關政久弛奸人出入自擅秋  
禁之嚴中流言萬厯九年京察坐貶歸途與妻孥共駕  
一牛車道旁觀者咸嘆息許孚遠嘗過張秋造其廬見  
茆屋數椽書史狼籍其中嘆曰益我疆風味大江以南  
未有也我疆者秋別號也後起官刑部主事厯尚寶丞  
少卿卒秋既歿廷臣為請諡者章數十上天啟初賜諡  
清憲化鯉自貢入太學即與秋道義相勗後為吏部郎  
而秋官尚寶比舍居食飲起居無弗共者時人稱二孟

化鯉之學得之洛陽尤時熙而秋受業於邑人張後覺  
時熙師曰劉魁後覺則顏鑰徐樾弟子也

來知德字矣鮮梁山人幼有至行有司舉為孝童嘉靖  
三十一年舉於鄉二親相繼歿廬墓六年不飲酒茹葷  
服除傷不及祿養終身麻衣蔬食誓不見有司其學以  
致知為本盡倫為要所著有省覺錄理學錄理學辨疑  
心學晦明解諸書而周易集註一篇用功尤篤自言學  
莫邃於易初結廬奎山學之六年無所得後遠客求溪



山中覃思者數年始悟易象又數年始悟文王序卦孔子雜卦之意又數年始悟變卦之非蓋二十九年而後書成萬歷三十年總督王象乾巡撫郭子章合詞論薦特授翰林待詔知德力辭詔以所授官致仕有司月給米三石終其身

鄧元錫字汝樞南城人十五喪父水漿不入口十七行社倉法惠其鄉人已為諸生遊邑人羅汝芳門又走吉安學於諸先達嘉靖三十四年舉於鄉復從鄧守益劉

邦采劉陽諸宿儒論學後不復會試杜門著述踰三十  
年五經皆有成書閎深博奧學者稱潛谷先生休寧范  
涑知南城時重元錫後為南昌知府萬厯十六年入覲  
薦元錫及劉元卿章潢於朝南京祭酒趙用賢亦請徵  
聘如吳與弼陳獻章故事得旨有司起送部試元錫固  
辭明年御史王道顯復以元錫元卿竝薦且請倣祖宗  
徵辟故事無拘部試詔令有司問病痊可起送赴部竟  
不行二十一年巡按御史秦大夔復並薦二人詔以翰

林待詔徵之有司敦遣上道甫離家而卒鄉人私謚文  
統先生元錫之學淵源王守仁不盡宗其說時心學盛  
行謂學惟無覺一覺即無餘蘊九容九思四教六藝皆  
桎梏也元錫力排之故生平博極羣書而要歸於六經  
所著五經繹函史上下編皇明書並行於世元卿字調  
父安福人舉隆慶四年鄉試明年會試對策極陳時弊  
主者不敢錄張居正聞而大怒下所司申飭且令人密  
詞之其人反以情告乃獲免既歸師同邑劉陽王守仁

弟子也萬厯二年會試不第遂絕意科名務以求道為  
事既累被薦乃召為國子博士擢禮部主事疏請早朝  
勤政又請從祀鄒守益王艮於文廟釐正外蕃朝貢舊  
儀尋引疾歸肆力撰述有山居草還山續草諸儒學案  
賢奕編思問編禮律類要大學新編諸書潢字本清南  
昌人居父喪哀毀血溢構此洗堂聯同志講學輯羣書  
百二十七卷曰圖書編又著周易象義詩經原體書經  
原始春秋竊義禮記劄言論語約言諸書從遊者甚衆

數被薦從吏部侍郎楊時喬請選授順天訓導如陳獻章來知德故事有司月給米三石贍其家卒於萬厯三十六年年八十二其鄉人稱黃自少迄老口無非禮之言身無非禮之行交無非禮之友目無非禮之書乃私謚文德先生自吳與弼後元錫元卿黃並蒙薦辟號江右四君子

明史卷二百八十三

欽定四庫全書

明史卷二百八十三考證

陳獻章傳廣東布政使彭韶總督朱英交薦

臣方煒

按是時韶等乞以禮聘獻章吏部尚書尹旻謂獻章向聽選京師非隱士比安用聘遂檄召至京見獻徵錄謹附識

賀欽傳子士諂鄉貢士嘗陳十二事論王政不報

臣

方煒按士諂所陳十二事獻徵錄識大錄諸書皆無

考謹附識

陳茂烈傳入為監察御史

臣方煒按茂烈為御史時

疏論道士崔志端不宜為尚書戶部尚書侶鍾諛佞  
取寵宜罷見識大錄謹附識

陳茂烈傳母卒茂烈亦卒

臣方煒按茂烈卒後都御

史王應鵬言茂烈廉約如石守道而所養獨純孝行  
如徐仲車而所處尤困請加優卹詔表宅里曰孝廉  
卹其家見明寶錄謹附識

湛若水傳授翰林院編修

臣方煒按正德中若水常

奉使安南冊封國王黎嗣却其餽不受見識大錄謹

附識

湛若水傳年九十五卒

臣方煒按若水之卒也贈太

子太保謚文簡見識大錄諸書傳未載謹附識

湛若水傳

蔣信附

累官四川水利僉事

臣

方煒按信

成進士後授戶部主事遷兵部員外郎出為四川僉

事在蜀三年草岷江一帶水驛丈復各衛養馬草場



又以商番交易茶馬全黎二夷爭路讐殺乃立科條  
一曰復秤盤二曰禁湖茶三曰限引目茶額既定私  
販悉絕蜀人便之見獻徵錄謹附識

鄒守益傳九廟災守益陳上下交修之道

臣方煒按

是時以廟災詔諸大臣自陳諸大臣皆惶恐引罪守  
益獨抗言交修之道故得罪見識大錄謹附識

錢德洪傳十一年始成進士累官刑部郎中

臣方煒

按德洪廷試後乞教授蘇州以便養南旋遷國子監

丞歷刑部主事至郎中見獻徵錄謹附識

王畿傳嘗云學當致知見性而已應事有小過不足累故在官弗免干請以不謹斥

臣方煒按是時薛應

旂為南考功郎中以不謹斥畿應旂亦坐補外南給事中游震得等為應旂訟應旂旋復京秩見獻徵錄謹附識

王畿傳 王艮附王氏弟子遍天下率都爵位有氣勢艮

以布衣抗其間聲名反出諸弟子上

臣方煒按是

時總漕都御史劉節吳史吳悌皆特疏薦艮不報御  
史洪垣構室居其徒有子璧幼隨父之守仁所師事  
王畿錢德洪最知名見識大錄謹附識

王畿傳

羅汝芳附

坐事為言官論罷

臣

方煒按汝芳

以叅政入賀既成禮請告出城集同志講學廣慧寺  
居正惡之遂諷言官疏劾致仕見識大錄所謂坐事  
者指此謹附識

王畿傳

楊起元附

累官吏部左侍郎拾遺

臣

方煒按

萬曆十九年起元以洗馬充講官有崇聖志勤聖學  
疏二十五年秋因災異復上恭勸勤學疏並見獻徵  
錄謹附識

歐陽德傳以薦起故官累遷吏部左侍郎

臣方煒按

德以故官起復未至遷南太常卿尋以原秩召掌國  
子監事至則遷禮部左侍郎旋轉吏部見識大錄謹  
附識

歐陽德傳德遇事侃侃裁制諸宗藩尤有執

臣方煒

按德居禮部時秦府為其中尉女請封崇陽王以罪  
賜死其宗人援他郡王例請襲德皆持弗許弋陽建  
安樂諸王爭攝寧府事德曰寧藩已絕豈尚有府事  
須攝耶又請下諸藩禁陳乞而裁諸罪宗廩給見獻  
徵錄所謂裁制宗藩者指此謹附識

歐陽德傳贈太子少保謚文莊

臣

方煒按隆慶中允

撫臣劉光濟之請敕有司建祠其鄉祀之見明實錄  
謹附識

羅洪先傳嚴嵩以同鄉故擬假邊才起用皆力辭

臣

方煒按御史凌儒嘗疏薦洪先帝怒奪儒職見明實

錄謹附識

吳悌傳及嵩擅政悌惡之引疾家居

臣方煒按悌為

御史時有請禁私交議蠲賑議振風紀諸疏見獻徵

錄謹附識

許孚遠傳會大計京朝官黜浙人幾半博鄉山西無一

焉

臣

方煒按是時給事中胡應嘉劾博庇私博連

疏乞休帝為斥應嘉而慰留博見紀事本末謹附識

許亨遠傳坐為李材訟寃貶二秩

臣方煒按材素從

鄒守益學嘗任雲南按察使征緬有功巡按御史蘇  
鄴劾其與副使陳巖之等虛張功伐帝怒特旨坐以  
斬論救者五十餘疏皆不聽繫詔獄五年見明紀事  
本末所謂為材訟寃者指此謹附識

尤時熙傳聞郎中劉魁得守仁之傳遂師事之魁以直  
言錮詔獄則書所疑時時從獄中質問

臣方煒按

是時帝用方士陶仲文言建雷壇於太液池西魁極  
陳其耗國不經帝震怒杖於廷而錮之見明紀事本  
末所謂直言者指此謹附識

尤時熙傳

張後覺附

年七十六以萬歷六年卒

臣方

煒按後覺之卒也維新言於郡守李士登立祠祀之  
士登又建四賢祠祀王道穆孔暉及後覺益秋見山

東通志謹附識

鄧以讚傳

張元忭附

元忭嘗抗疏救御史胡濬

臣方



煒按神宗即位之冬妖星見慈慶宮後火洊言星陰  
象火積陰所成請放宮女疏語忤帝斥為民元忤乃  
疏救之見明實錄謹附識



總校官編修臣吳紹濬

欽定四庫全書薈要

史部

明史卷二百八十四

詳校官兵部主事臣雷純



欽定四庫全書薈要卷六千八百七十七 史部

明史卷二百八十四

大學士張廷玉等奉 敕修

列傳第一百七十二

儒林三

孔希學

孔彥繩  
孔聞禮

顏希惠  
孟希文

曾質粹  
仲子陞

周冕

程接道

程克仁

張文運

邵繼祖

朱挺

朱豎

孔希學字士行先聖五十六代孫也世居曲阜祖思晦

字明道仕元為教諭有學行仁宗時以思晦襲封衍聖

公卒諡文肅子克堅襲克堅字璟夫至正六年中書言

衍聖公階止嘉議大夫與爵不稱乃進通奉大夫予銀

印十五年有薦其明習禮樂者徵為同知太常禮儀院

事以子希學襲封克堅累遷國子祭酒二十二年克堅

謝病還闕里後起集賢學士山東廉訪使皆不赴洪武

元年三月徐達下濟寧克堅稱疾遣希學來見達送之

京師希學奏父病不能行太祖敕諭克堅末言稱疾則不可會克堅亦來朝遇使者淮安惶恐兼程進見於謹身殿問以年對曰臣年五十有三曰爾年未邁而病嬰之今不煩爾以官爾家先聖後子孫不可不學爾子溫厚俾進學克堅頓首謝即日賜宅一區馬一匹米二十石明日復召見命以訓厲族人因顧侍臣曰先聖後特優禮之養以祿而不任以事也十一月命希學襲封衍聖公置官屬曰掌書曰典籍曰司樂曰知印曰奏差曰

書寫各一人立孔顏孟三氏教授司教授學錄學司各  
一人立尼山洙泗二書院各設山長一人復孔氏子孫  
及顏孟大宗子孫徭役又命其族人希大為曲阜世襲  
知縣而進衍聖公秩二品階資善大夫賜之誥曰古之  
聖人自羲農至於文武法天治民明竝日月德化之盛  
莫有加焉然皆隨時制宜世有因革至於孔子雖不得  
其位會前聖之道而通之以垂教萬世為帝者師其孫  
子思又能傳述而名言之以極其盛有國家者求其統

緒尊其爵號蓋所以崇德報功也歷代以來膺襲封者  
或不能繩其祖武朕甚閔焉當臨御之初訪世襲者得  
五十六代孫孔希學大宗是紹爰行典禮以致褒崇爾  
其領袖世儒益展聖道之用於當世以副朕之至望豈  
不偉歟希大階承事郎賜之敕三年春克堅以疾告歸  
遣中使慰問疾篤詔給驛還家賜白金文綺舟次邳州  
卒六年八月希學服闋入朝命所司致廩餼從人皆有  
賜復勞以敕賜襲衣冠帶九月辭歸命翰林官錢於光



祿寺賚白金文綺明年二月希學言先聖廟堂廊廡圯  
壞祭器樂器法服不備乞命有司修治先世田兵後多  
蕪而徵賦如故乞減免竝從之自是每歲入朝班亞丞  
相皆加宴賚希學好讀書善隸法文詞爾雅每賓客譙  
集談笑揮灑爛然成章承大亂之後廟貌服物畢力修  
舉盡還舊觀十四年卒命守臣致祭子訥字言伯十七  
年正月襲封命禮官以教坊樂導送至國學學官率諸  
生二千餘人迎於成賢街自後每歲入覲給符乘傳帝

既草丞相官遂令班文臣首訥性恭謹處宗黨有恩建  
文二年卒子公鑑襲公鑑字昭文有孝行嗣爵二年卒  
成祖即位遣使致祭子彥縉字朝紳永樂八年襲甫十  
歲命肄業國學久之遣歸十五年修闕里文廟成御製  
碑文勒石仁宗踐阼彥縉來朝仁宗語侍臣曰外蕃貢  
使皆有公館衍聖公假館民間非崇儒重道意遂賜宅  
東安門外宣德四年彥縉將遣使福建市書咨禮部部  
臣以聞命市與之已奏闕里雅樂及樂舞生冠服敝壞

詔所司修治景泰元年帝幸學彥縉率三氏子孫觀禮  
賜坐彝倫堂聽講幸學必先期召衍聖公自此始彥縉  
幼孤能自立然與族人不睦景泰六年族祖克昫等與  
彥縉相訐帝置不問彥縉子承慶先卒孫弘緒字以敬  
甫八歲而彥縉卒妾江訴弘緒幼弱為族人所侵詔遣  
禮部郎為治喪而命其族父公恂理家事驛召弘緒至  
京襲封賜玉帶金印簡教授一人課其學英宗復辟入  
賀朝見便殿握其手置膝上語良久弘緒纔十歲進止

有儀帝甚悅每歲入賀聖壽帝聞其賜第湫隘以大第  
易之凡南城賞花西苑較射皆與焉公恂字宗文景泰  
五年舉會試聞母疾不赴廷對帝問禮部得其故遣使  
召之日且午不及備試卷命翰林院給筆札登第即丁  
母憂歸天順初授禮科給事中大學士李賢言公恂至  
聖後贊善司馬恂宋大賢溫國公光後宜輔導太子帝  
喜同日起拜少詹事侍東宮講讀入語孝肅皇后曰吾  
今日得聖賢子孫為汝子傳孝肅皇后者憲宗生母方

以皇貴妃有寵於是具冠服拜謝宮中傳為盛事云成  
化初以言事謫漢陽知府未至丁父憂服闋還故秩莅  
南京詹事府久之卒弘緒少貴又恃婦翁大學士李賢  
多過舉成化五年被劾按治奪爵為庶人令其弟弘泰  
襲弘泰歿爵仍歸弘緒子弘泰字以和既嗣爵弘治十  
一年山東按臣言弘緒遷善改行命復冠帶明年六月  
聖殿災弘泰方在朝弘緒率子弟奔救素服哭廟蔬食  
百日弘泰還亦齋哭如居喪弘泰生七月而孤奉母孝

與弘緒友愛無間言十六年卒弘緒子聞韶襲聞韶字  
知德明年新廟建規制踰舊遣大學士李東陽祭告御  
製碑文勒石正德二年以鄒縣子思子廟主祀乏人奏  
請弟聞禮主之帝授聞禮五經博士主子思子祀事世  
以衍聖公弟為之又請尼山洙泗兩書院各設學錄一  
人薦族之賢者充焉從之六年山東盜起聞韶與巡撫  
趙璜請城闕里遷曲阜縣治以衛廟不果行嘉靖二十  
五年聞韶卒子貞幹襲貞幹字用濟三十五年入朝卒

子尚賢襲尚賢字象之巡撫丁以忠言尚賢冲年宜如  
弘泰例國學肄業從之萬厯九年庶母郭氏訐尚賢帝  
為革供奉女樂二十六戶令三歲一朝十七年尚賢仍  
請比歲入賀許之尚賢博識天啟元年卒子蔭椿先卒  
無嗣從弟子蔭植襲蔭植字對寰祖貞寧衍聖公貞幹  
弟也任為五經博士父尚坦國學生追封衍聖公蔭植  
先為博士尚賢既喪子遂育為嗣天啟四年以覃恩加  
太子太保崇禎元年加太子太傅

孔彥繩字朝武衢州西安人先聖五十九代孫也宋建炎中衍聖公端友扈蹕南渡因家衢州高宗命以州學為家廟賜田五頃以奉祭祀五傳至洙元至元間命歸曲阜襲封洙讓爵曲阜之弟治弘治十八年衢州知府沈杰奏言衢州聖廟自孔洙讓爵之後衣冠禮儀猥同氓庶今訪得洙之六世孫彥繩請授以官俾主祀事又言其先世祭田洪武初輕則起科後改徵重稅請仍改輕以供祀費帝可之正德元年授彥繩翰林院五經博



士子孫世襲并減其祭田之稅彥繩卒子承美字永實  
十四年襲卒子弘章字以達嘉靖二十六年襲卒子聞  
音字知政萬厯五年襲卒子貞運字用行四十三年襲  
時以在曲阜者為孔氏北宗在西安者為南宗云

顏希惠復聖五十九代孫也洪武初以顏子五十七代  
孫池為宣德府學教授十五年改三氏學教授以奉祀  
事池字德裕子拳字克膺拳子希仁字士元景泰三年  
詔以顏孟子孫長而賢者各一人至京官之其年希仁

為巡按御史顧睢所劾詔黜希仁召希惠以為翰林院  
五經博士未幾以希惠非嫡子仍以希仁長子議為之  
議字定伯成化元年賜第京師入覲馳驛以為常議卒  
子鏞字宗器十八年襲卒子重德字尚本正德二年襲  
卒子從祖字守嗣襲卒無子嘉靖四十一年以從祖從  
父重禮之長子肇先為嗣肇先字啟源卒子嗣慎字用  
修襲卒長子尹宗先卒次子尹祚字永錫萬厯年襲尹  
祚為人博學好義尹宗之子伯貞既長遂以其職讓之

伯貞字叔節二十七年襲卒子幼弟伯廉字叔清三十四年襲卒子紹緒崇禎十四年襲

曾質粹字好古吉安永豐人宗聖五十九代孫也其先都鄉侯據避新莽之亂徙家豫章子孫散居撫吉諸郡間成化初山東守臣上言嘉祥縣南武山西南元寨山之東麓有漁者陷穴中得懸棺碣曰曾參之墓詔加修築正德間山東僉事錢鏐訪得曾子之後一人于嘉祥山中未幾而沒嘉靖十二年以學士顧鼎臣言詔求

嫡嗣於是江西撫按以質粹名聞命回嘉祥以衣巾奉  
祀十八年授翰林院五經博士子孫世襲三十九年卒  
子昊未襲卒昊子繼祖字繩之少病目江西族人衮謀  
奪其職為給事中劉不息御史劉光國所糾於是罷衮  
官而繼祖仍主祀事卒子承業字洪福萬厯五年襲卒  
子弘毅字泰東崇禎元年襲卒子聞達字象輿十四年  
襲

孔聞禮字知節衍聖公聞韶弟也正德元年詔授翰林

院五經博士以奉述聖祀事自後世以衍聖公弟為之  
聞禮卒嘉靖二十五年貞寧字用致襲卒萬厯二十二  
年蔭桂襲卒天啟二年蔭隆襲卒八年尚達襲卒崇禎  
十年蔭相襲卒十四年蔭錫襲卒十六年蔭鈺襲

孟希文字士煥亞聖五十六代孫也洪武元年詔以孟  
子五十四代孫思諒奉祀世復其家思諒字友道子克  
仁字信夫克仁子希文景泰三年授希文翰林院五經  
博士子孫世襲卒子元字長伯弘治二年襲卒子公榮

幼嘉靖二年以元弟亨之子公肇襲公肇字先文少好學事繼母孔氏以孝聞卒十二年仍以公榮襲公榮字橐文卒子彥璞字朝璽隆慶元年襲卒子承光萬厯二十九年襲卒子弘譽天啟三年襲卒子聞玉崇禎二年襲

仲子陞先賢仲子六十二代孫也萬厯十五年詔以仲子五十九代孫呂為奉祀呂子銓銓子則顯則顯子于陞崇禎十六年以衍聖公孔蔭植言詔授于陞翰林院

五經博士子孫世襲賜泗水縣濟寧州田六十餘頃廟  
戶三十一以奉其祭祀焉

周冕先賢元公周子十二代孫也其先道州人熙寧中  
周子葵母江州子孫因家廬山蓮花峰下景泰七年授  
冕翰林院五經博士子孫世襲還鄉以奉周子祀事卒  
子繡麟襲卒子道襲卒子聯芳襲卒子濟襲卒從弟汝  
忠襲卒子蓮應襲

程接道先賢正公程子後也宋淳熙間純公程子五世

孫有居江寧者嘗主金陵書院祀事卒以名幼學者承之明初失傳崇禎三年河南巡按李日宣請以正公之後為之嗣詔許之遂以接道為翰林院五經博士子孫世襲十四年土賊于大忠作亂接道力拒死之

程克仁先賢正公程子十七代孫也世居嵩縣之六渾景泰六年授翰林院五經博士子孫世襲以奉程子祀事卒子繼祖襲卒仲子世宥襲卒子心傳襲心傳莊重寡言為鄉黨所稱卒弟宗益襲卒從子佳引襲卒從弟



佳祚襲崇禎十四年為土賊于大忠所殺

張文運鄆人先賢明公張子十四代孫也天啟二年授翰林院五經博士子孫世襲以奉張子祀事崇禎三年卒子承引以父憂未襲六年卒子元祥

本朝康熙元年襲

邵繼祖洛陽人先賢康節公邵子二十七代孫也崇禎三年河南巡按吳姓請以繼祖為翰林院五經博士子孫世襲以奉邵子祀事詔從之卒子養醇襲

朱挺字孟齡先賢文公朱子九世孫也世居福建建安縣之紫霞洲景泰六年授翰林院五經博士子孫世襲以奉朱子祀事挺為人淳謹言動有則卒子燉字孔暉襲燉以事入都中途遇盜未幾有遺金道上者燉守之以還其人人稱其廉介卒子璽字元厚襲卒子濬襲卒以還其人人稱其廉介卒子璽字元厚襲卒子濬襲卒子法字兆祖襲法為人孝友卒子健字士啟襲卒子瑩字惟玉襲卒子之儁字喬之襲

朱墅先賢文公朱子十一世孫也正德間給事中戴銑

汪元錫御史王完等相繼言朱子繼孔子者也孔子之  
後有曲阜西安朱子之後亦有建安婺源今建安恩典  
已隆在婺源者請依闕里之例錄其子孫一人量授以  
官俾掌祠事詔許之嘉靖二年授墅翰林院五經博士  
三十八年以本學訓導席端言令其世襲墅卒子鎬襲  
卒子德洪襲卒子邦相襲卒子煜襲卒子坤襲

明史卷二百八十四

欽定四庫全書

明史卷二百八十四考證

孔希學傳以子希學襲封克堅累遷國子祭酒

臣方

煒按克堅以子希學襲封拜中臺治書侍御史改山東廉訪使起為集賢直學士改禮部尚書遷陝西行臺侍御史旋遷國子祭酒見關里文獻考謹附識

孔希學傳洪武元年三月徐達下濟寧克堅稱疾遣希學來見

臣

方煒按希學元末襲封時並兼秘書卿

見闕里文獻考謹附識

孔希學傳十一月命希學襲封衍聖公

臣

方煒按洪

武二年四月命博士孔克仁等授諸子經功臣子弟亦令入學見明實錄謹附識

孔希學傳十五年修闕里文廟成御製碑文勒石

臣

方煒按永樂十二年正月詔修闕里及十四年十二月詔修曲阜復聖廟並命凡從祀諸賢之廟有壞皆修之見明實錄謹附識

孔希學傳驛召弘緒至京襲封賜玉帶金印

臣方煒

按弘緒襲封時帝親賜玉帶以軀尚小去二銖授之  
又賜金圖書一其文曰謹禮崇德見闕里文獻考傳  
所謂金印者指此謹附識

孔希學傳成化初以言事謫漢陽知府

臣方煒按成

化元年給孔顏孟三氏學印令三年貢有學行者一  
人入國子監見明實錄謹附識

孔希學傳弘緒少貴又恃婦翁大學士李賢多過舉成

化五年被劾按治

臣方煒按弘緒初為南京科道

所劾下巡撫原傑按之悉得其非法用刑勒殺無辜  
狀以聞命官會問坐以斬帝特從寬奪爵見明實錄  
所謂多過舉者指此謹附識

孔希學傳萬歷九年庶母郭氏訐尚賢帝為草供奉女  
樂二十六戶

臣方煒按明實錄萬歷九年八月尚

賢庶母郭氏因受尚賢凌轢乃訐奏尚賢濫用女樂  
賄受船戶及歲賀入京騷擾驛遞諸事下撫按覆覈

帝切責而貸之傳未晰謹附識

孔希學傳崇禎元年加太子太傅

臣方煒按崇禎元

年追贈尚賢太子太保見闕里文獻考傳未載謹附

識

孔彥繩傳洙尚爵曲阜之弟治

臣方煒按洙讓爵後

命為國子祭酒兼提舉浙東學校事見闕里文獻考

謹附識

顏希惠傳其年希仁為巡按御史顧睢所劾詔黜希仁



召希惠以為翰林院五經博士

臣方煒按希仁以

何事被劾明實錄諸書皆無可考謹附識

曾質粹傳宗聖五十九代孫也

臣方煒按職官志以

質粹為宗聖六十代孫與此互異謹附識

曾質粹傳正德間山東僉事錢鉉訪得曾子之後一人  
於嘉祥山中

臣

方煒按正德二年七月命山東修

理曾子廟從巡按御史金洪請也見明實錄謹附識

孔聞禮傳聞禮卒嘉靖二十五年貞寧字用致襲

臣

方煒按王世貞衍聖公爵系表稱聞禮卒弟聞詩襲  
聞詩卒聞韶之子貞寧襲而武宗實錄元年四月己  
卯授聞詩翰林院五經博士先是衍聖公弘泰卒爵  
歸聞韶次子聞詩充三氏學生聞韶援文臣蔭錄之  
例以請乃有是命皆與此異謹附考

孟希文傳承光萬歷二十九年襲

臣

方煒按承光於

天啓二年與長子弘畧拒妖賊徐鴻儒與母孔氏俱  
被害事聞贈承光太僕少卿孔氏貞淑恭人弘畧太

常丞遣官諭祭專祠祀之見闕里志謹附識

欽定四庫全書薈要卷六千八百七十八史部

明史卷二百八十五

大學士張廷玉奉 敕修

列傳第一百七十三

文苑

明初文學之士承元季虞柳黃吳之後師友講貫學有本原宋濂王禕方孝孺以文雄高楊張徐劉基袁凱以詩著其他勝代遺逸風流標映不可指數蓋蔚然稱盛

已永宣以還作者遞興皆沖融演迤不事鉤棘而氣體  
漸弱弘正之間李東陽出入宋元溯流唐代擅聲館閣  
而李夢陽何景明倡言復古文自西京詩自中唐而下  
一切吐棄操觚談藝之士翕然宗之明之詩文於斯一  
變迨嘉靖時王慎中唐順之輩文宗歐曾詩倣初唐李  
攀龍王世貞輩文主秦漢詩規盛唐王李之持論大率  
與夢陽景明相倡和也歸有光頗後出以司馬歐陽自  
命力排李何王李而徐渭湯顯祖袁宏道鍾惺之屬亦

各爭鳴一時於是宗李何王李者稍衰至啟禎時錢謙益父南英準北宋之矩矱張溥陳子龍擷東漢之芳華又一變矣有明一代之士卓卓表見者其源流大抵如此今博考譜家之集叅以衆論錄其著者作文苑傳

楊維禎

陸居仁  
錢惟善

胡翰

蘇伯衡

王冕  
郭奎  
鎬炳

戴良

王達  
丁鶴年

危素

張以寧

石光霽  
秦裕伯

趙堦

宋僖等

徐一夔

趙撝謙

樂

良等

陶宗儀

顧德輝等

袁凱

高啟

楊基等

王行

唐肅

克等

孫賁

王佐等

王蒙

郭

傳

楊維禎字廉夫山陰人母李夢月中金錢墜懷而生維

禎少時日記書數千言父宏築樓鐵崖山中繞樓植梅

百株聚書數萬卷去其梯俾誦讀樓上者五年因自號

鐵崖元泰定四年成進士署天台尹改錢清場鹽司令

捐直忤物十年不調會修遼金宋三史成維楨著正統  
辯十餘言總裁官歐陽元功讀且嘆曰百年後公論定  
於此矣將薦之而不果轉建德路總管府推官擢江西  
儒學提舉未上會兵亂避地富春山徙錢塘張士誠累  
招之不赴遣其弟士信咨訪之因撰五論具書復士誠  
反覆告以順逆成敗之說士誠不能用也又忤達實丞  
相徙居松江之上海內薦紳大夫與東南才俊之士造  
門納履無虛日酒酣以往筆墨橫飛或戴華陽巾披羽



衣坐船屋上吹鐵笛作梅花弄或呼侍兒歌白雪之辭  
自倚鳳琶和之賓客皆踟躕起舞以為神仙中人洪武  
二年太祖召諸儒纂禮樂書以維禎前朝老文學遣翰  
林詹同奉幣詣門維禎謝曰豈有老婦將就木而再理  
嫁者邪明年復遣有司敦促賦老客婦謠一章進御曰  
皇帝竭吾之能不強吾所不能則可否則有蹈海死耳  
帝許之賜安車詣闕廷留百有一十日所纂叙例畧定  
即乞骸骨帝成其志仍給安車還山史館曹監之士祖

帳西門外宋濂贈之詩曰不受君王五色詔白衣宣至  
白衣還蓋高之也抵家卒年七十五維禎詩名擅一時  
號鐵崖體與永嘉李孝光茅山張羽錫山倪瓚崑山顧  
瑛為詩文友碧桃叟釋臻知歸叟釋現清容叟釋信為  
方外交張雨稱其古樂府出入少陵二李間有曠世金  
石聲宋濂稱其論撰如覩商敦周彝雲雷成文而寒芒  
橫逸詩震蕩陵厲鬼設神施尤號名家云維禎從松江  
時與華亭陸居仁及僑居錢惟善相倡和惟善字思復

錢塘人至正元年省試羅剎江賦時鎖院三千人獨惟  
善据枚乘七發辨錢塘江為曲江由是得名號曲江居  
士官副提舉張士誠據吳遂不仕居仁字宅之中泰定  
三年鄉試隱居教授自號雲松野衲兩人既歿與維楨  
同葬于山人目為三高士墓

胡翰字仲申金華人幼聰穎異常兒七歲時道拾遺金  
坐守待其人還之長從蘭谿吳師道浦江吳萊學古文  
復登同邑許謙之門同郡黃潛柳貫以文章名天下見

翰文稱之不容口游元都公卿交譽之與武威余關宣城貢師泰尤善或勸之仕不應既歸遭天下大亂避地南華山著書自適文章與宋濂王禕相上下太祖下金華召見命與許元等會食中書省後侍臣復有薦翰者召至金陵時方籍金華民為兵翰從容進曰金華人多業儒鮮習兵籍之徒糜餉耳太祖即罷之授衢州教授洪武初聘修元史書成受賚歸愛北山泉石卜築其下徜徉十數年而終年七十有五所著有春秋集義文曰

胡仲子集詩曰長山先生集

蘇伯衡字平仲金華人宋門下侍郎轍之裔也父友龍  
受業許謙之門官蕭山令行省都事明師下浙東坐長  
子仕閩謫徙滁州李善長奏官之力辭歸伯衡警敏絕  
倫博洽羣籍為古文有聲元末貢於鄉太祖置禮賢館  
伯衡與烏歲丙午用為國子學錄遷學正被薦召見擢  
翰林編修力辭乞省覲歸洪武十年學士宋濂致仕太  
祖問誰可代者濂對曰伯衡臣鄉人學博行修文詞蔚

贍有法太祖即徵之入見復以疾辭賜衣鈔而還二十  
一年聘主會試事竣復辭還尋為處州教授坐表箋誤  
下吏死二子恬怡救父并被刑

王冕字元章諸暨人幼貧父使牧牛竊入學舍聽諸生  
誦書暮乃返亡其牛父怒撻之已而復然母曰兒癡如  
此曷不聽其所為冕因去依僧寺夜坐佛膝上映長明  
燈讀書會稽韓性聞而異之錄為弟子遂稱通儒性卒  
門人事冕如事性屢應舉不中棄去北游燕都客秘書卿

台哈布哈家擬以館職薦力辭不就既歸每大言天下  
將亂攜妻孥隱九里山樹梅千株桃杏半之自號梅花  
屋主善畫梅求者踵至以幅長短為得米之差嘗做周  
官著書一卷曰持此遇明主伊呂事業不難致也太祖  
下婺州物色得之置幕府授諮議叅軍一夕病卒同時  
郭奎錙炳皆早叅戎幕以詩名奎字子章巢縣人從余  
關學治經關亟稱之太祖為吳國公來歸從事幕府朱  
文正開大都督府於南昌命奎叅其軍事文正得罪奎

坐誅炳字彥昂鄱陽人至正中從軍於浙太祖起淮南獻書言事用為中書典籤洪武初從事大都督府出為知縣閱兩考以病告歸久之卒

戴良字叔能浦江人通經史百家暨醫卜釋老之說學古文於黃潛抑貫吳萊貫卒經紀其家太祖初定金華命與胡翰等十二人會食省中日二人更番講經史陳治道明年用良為學正與宋濂葉儀輩訓諸生太祖既旋師良忽棄官逸去辛丑元順帝用薦者言授良江北



行省儒學提舉良見時事不可為避地吳中依張士誠  
久之見士誠將敗挈家泛海抵登萊欲間行歸庫庫軍  
道梗寓昌樂數年洪武六年始南還變姓名隱四明山  
太祖物色得之十五年召至京師試以文命居會同館  
日給大官膳欲官之以老疾固辭忤旨明年四月暴卒  
盖自裁也元亡後惟良與王逢不忘故主每形於歌詩  
故卒不獲其死云良世居金華九靈山下自號九靈山  
人逢字原吉江陰人至正中作河清頌臺臣薦之稱疾

辭張士誠據吳其弟士德用逢策北降於元以拒明太祖滅士誠欲辟用之堅臥不起隱上海之烏涇歌咏自適洪武十五年以文學徵有司敦迫上道時子掖為通事司令以父年高叩頭泣請乃命吏部符止之又六年卒年七十有梧溪詩集七卷逢自稱席帽山人時人有丁鶴年者回回人曾祖阿喇卜丹與弟烏瑪爾皆巨商元世祖征西域乏饟阿喇卜丹杖策軍門盡以貲獻論功賜田宅京師奉朝請烏瑪爾累官甘肅行省左丞父智

默羅丹以世廕為武昌縣達嚕噶齊有惠政解官留葬  
其地至正壬辰武昌被兵鶴年年十八奉母走鎮江母  
歿鹽酪不入口者五年避地四明方國珍據浙東最忌  
色目人鶴年轉徙逃匿為童子師或寄僧舍賣漿自給  
及海內大定牒請還武昌而生母已道阻前死瘞東村  
廢宅中鶴年慟哭行求母告以夢乃嚙血沁骨斂而葬  
焉烏斯道為作丁孝子傳鶴年自以家世仕元不忘故  
國順帝北遁後飲泣賦詩情詞悽惻晚學浮屠法廬居

父墓以永樂中卒。竊年好學，洽聞精詩律。楚昭莊二王咸禮敬之。正統中，憲王刻其遺文行世。

危素字太樸，金谿人。唐撫州刺史全諷之後。少通五經，遊吳澄、范梈門。至正元年，用大臣薦授經筵檢討。修宋、遼、金三史及注爾雅，咸賜金及宮人，不受。由國子助教遷翰林編修纂后妃等傳事，逸無據，素買餽餅饋宦寺，叩之得實，乃筆諸書。卒為全史。遷太常博士、兵部員外郎、監察御史、工部侍郎，轉大司農丞、禮部尚書。時亂將

亟素每抗論得失十八年叅中書省事請專任平章昂  
珠總西方兵毋迎帝師悞軍事用布延布哈為叅政經  
畧江南立兵農宣撫使司以安畿內任賢守令以撫流  
竄之民且曰今日之事宜卧薪嘗膽力圖中興尋進御  
史臺治書侍御史二十年拜叅知政事俄除翰林學士  
承旨出為嶺北行省左丞言事不報棄官居房山素為  
人侃直數有建白敢任事上都宮殿火敕重建大安睿  
思二閣素諫止之請親祀南郊築北郊以斥合祭之失

因進講陳民間疾苦詔為發錢粟振河南永平民淮南  
兵亂素往廉問假便宜發楮幣振維揚京口饑居房山  
者四年明師將抵燕淮王特穆爾布哈監國起為承旨  
如故素甫至而師入乃趨所居報恩寺入井寺僧大梓  
力挽起之曰國史非公莫知公死是死國史也素遂止  
兵迫史庫往告鎮撫吳勉輩出之元寶錄得無失洪武  
二年授翰林侍講學士數訪以元興亡之故且詔撰皇  
陵碑文皆稱旨頃之坐失朝被劾罷居一歲復故官兼

弘文館學士賜小車免朝謁嘗偕諸學士賜宴屢遣內  
官勸之酒御製詩一章以示恩寵命各以詩進素詩最  
後成帝獨覽而善之曰素老成有先憂之意時素已七  
十餘矣御史王著等論素亡國之臣不宜列侍從詔謫  
居和州守余闕廟歲餘卒先是至元間西僧嗣古妙高  
欲燬宋會稽諸陵夏人嘉木揚喇勒智為江南總攝悉  
掘徽宗以下諸陵攫取金寶哀帝后遺骨瘞於杭之故宮  
築浮屠其上名曰鎮南以示厭勝又截理宗顱骨為飲

罷及敗其資皆籍於官顧骨亦入宣政院以賜所謂帝師者素在翰林時宴見備言始末帝歎息良久命北平守將購得顧骨於西僧儒克鴈所諭有司厝於高坐寺西北其明年紹興以永穆陵圖來獻遂敕葬故陵實自素發之云

張以寧字志道古田人父一清元福建江西行省叅知政事以寧年八歲或訟其伯父於縣繫獄以寧詣縣伸理尹異之命賦琴堂詩立就伯父得釋以寧用是知名



泰定中以春秋舉進士由黃巖判官進六合尹坐事免官滯留江淮者十年順帝徵為國子助教累至翰林侍讀學士知制誥在朝宿儒虞集歐陽元揭傒斯黃潛之屬相繼物故以寧有俊才博學強記擅名於時人呼小張學士明師取元都與危素等皆赴京奏對稱旨復授侍講學士特被寵遇帝嘗登鍾山以寧與朱升秦裕伯等扈從擁翠亭給筆札賦詩洪武二年秋奉使安南封其主陳日烓為國王御製詩一章遣之甫抵境而日烓

卒國人乞以印詔授其世子以寧不聽留居洱江上諭  
世子告哀於朝且請襲爵既得命俟後使者林唐臣至  
然後入境將事事竣教世子服三年喪令其國人效中  
國行頌首稽首禮天子聞而嘉之賜璽書比諸陸賈馬  
援再賜御製詩八章及還道卒詔有司歸其柩所在致  
祭以寧為人潔清不營財產奉使往還襍被外無他物  
本以春秋致高第故所學尤專春秋多所自得譔胡傳  
辨疑最辨博惟春王正月考未就寓安南踰半歲始卒

業元故官來京者素及以寧名尤重素長於史以寧長於經素宋元史藁俱失傳而以寧春秋學遂行門人石光霽字仲濂泰州人讀書五行俱下洪武十三年以明經舉授國子學正進博士作春秋鈎元能傳以寧之學裕伯字景容大名人士元累官至福建行省郎中遭世亂棄官客揚州久之復避地上海居母喪盡禮張士誠據姑蘇遣人招之拒不納吳元年太祖命中書省檄起之裕伯對使者曰食元祿二十餘年而背之不忠也母

喪未終忘哀而出不孝也乃上中書省固辭洪武元年  
復徵稱病不出帝乃手書諭之曰海濱民好鬪裕伯智  
謀之士而居此地堅守不起恐有後悔裕伯拜書涕泗  
橫流不得已偕使者入朝授侍讀學士固辭不允與張  
以寧等扈從登鍾山擁翠亭給筆札賦詩甚見寵待二  
年改待制旋為治書侍御史三年始詔設科取士以裕  
伯與御史中丞劉基為京畿主考官裕伯博辨善論說  
占奏悉當帝意帝數稱之出知隴州卒於官

趙樵字伯友新喻人好學工屬文元至正中舉於鄉為  
上猶教諭洪武二年太祖詔修元史命左丞相李善長  
為監修官前起居注宋濂漳州府通判王禕為總裁官  
徵山林遺逸之士汪克寬胡翰宋僖陶凱陳基曾魯高  
啟趙汴張文海徐尊生黃麓傅恕王錡傳著謝徽為纂  
修官而樵與焉以是年二月開局天界寺取元經世大  
典諸書用資參考至八月成諸儒並賜賚遣歸而順帝  
一朝史猶未脩乃命儒士歐陽佑等往北平采遺事明

年二月還朝重開史局仍以宋濂王禕爲總裁徵四方  
文學士朱右貝瓊朱廙王彝張孟兼高遜志李懋李汶  
張宣張簡杜寅殷弼俞寅及璵爲纂修官先後纂修三  
十人兩局並與者璵一人而已閏六月書成諸儒多授  
官惟璵及朱右朱濂不受歸尋召修日厯授翰林編修  
高麗遣使朝貢賜宴樂作使者以國喪辭璵進曰小國  
之喪不廢大國之禮太祖甚悅命與宋濂同職史館濂  
兄事之嘗奉詔撰甘露頌太祖稱善出爲靖江王府長

史卒始與熈同纂修者汪克寬陶凱曾魯高啟趙汴貝  
瓊高遜志並有傳今自宋僖以下可考者附著於篇宋  
僖字無逸餘姚人元繁昌教諭遭亂歸史事竣命典福  
建鄉試陳基字敬初臨海人少與兄聚受業於義烏黃  
潛從潛游京師授經筵檢討嘗為人草諫章力陳順帝  
並后之失順帝欲罪之引避歸里已奉母入吳參太尉  
張士誠軍事士誠稱王基獨諫止欲殺之不果吳平召  
修元史賜金而還洪武三年冬卒初士誠與太祖相持

基在其幕府書檄多指斥及吳亡吳臣多見誅基獨免  
世所傳夷白集其指斥之文猶備列云張文海鄞人與  
同里傳恕並入史館徐尊生字大年淳安人元史成受  
賜歸復同修日厯後以宋濂薦授翰林應奉文字草制  
悉稱旨尋以老疾辭還傳恕字如心鄞人學通經史與  
同郡烏斯道鄭真皆有文名洪武二年詣闕陳治道十  
二策曰正朝廷重守令馭外蕃增祿秩均民田更法役  
黜異端易服制興學校慎選舉罷榷鹽停榷茶太祖嘉



納之遂命修元史事竣授博野知縣後坐累死斯道字  
繼善慈谿人與兄本良俱有學行洪武中斯道被薦授  
石龍知縣調永新坐事謫役定遠放還卒斯道工古文  
兼精書法子緝亦善書文洪武四年舉鄉試第一授臨  
淮教諭入見賜之宴賦詩稱旨除廣信教授自號榮陽  
外史博著字則明長洲人史成歸為常熟教諭魏觀行  
鄉飲酒禮長洲教諭周敏侍其父南老著侍其父玉皆  
降而北面立觀禮者以為盛事焉厯官知府卒謝徽字

元懿長洲人史成授翰林國史院編修尋擢吏郎郎中  
力辭不拜歸復起國子助教卒徽博學工詩文與同邑  
高啟齊名弟恭字元功亦能詩朱右字伯賢臨海人史  
成辭歸已徵修日厯寶訓授翰林編修遷晉府右長史  
九年卒官朱廉字伯清義烏人幼力學從黃潛學古文  
知府王宗顯辟教郡學李文忠鎮嚴州延為鈞臺書院  
山長洪武初元史成不受官歸尋徵修日厯除翰林編  
修八年扈駕中都進詩十章太祖稱善為和六章賜之

已而授楚王經遷楚府右長史久之辭疾歸康好程朱之學嘗取朱子語類摘其精義名曰理學纂言王彝字常宗其先蜀人父為崑山教授遂卜居嘉定少孤貧讀書天台中師事王貞文得蘭谿金履祥之傳學有端緒嘗著論力詆楊維禎目為文妖元史成賜銀幣還又以薦入翰林母老乞歸坐知府魏觀事與高啟俱被殺張孟兼浦江人名丁以字行史成授國子學錄歷禮部主事太常司丞劉基嘗為太祖言今天下文章宋濂第

一其次即臣基又次即孟兼太祖領之孟兼性傲嘗坐累謫輸作已復官太祖顧孟兼謂濂曰卿門人邪濂對非門人乃邑子也其為文有才臣劉基嘗稱之太祖熟視孟兼曰生骨相薄仕宦徐徐乃可耳未幾用為山西僉事廉勁疾惡糾摘奸猾令相牽引每事輒株連數十人吏民間張僉事行部凜然墮膽聲聞於朝擢山東副使布政使吳印者僧也太祖驟貴之寵眷甚孟兼易之印謁孟兼由中門入孟兼杖守門卒已又以他事與相

往太祖先入印言逮答孟兼孟兼憤捕為印書奏者欲  
論以罪印復上書言狀太祖大怒曰豎儒與我抗邪械  
至關下命棄市李汶字宗茂當塗人博學多才史成除  
巴東知縣移南和晚年歸里以經學訓後進張宣字藻  
重江陰人洪武初以考禮徵尋預修元史太祖親書其  
名召對殿廷即日授翰林編修呼為小秀才奉詔歸娶  
年已三十矣六年坐事謫徙濠梁道卒張簡字仲簡吳  
縣人初師張雨為道士隱居鴻山元季兵亂以母老歸

養遂返儒服洪武三年薦修元史當元季浙東西士大  
大以文墨相尚每歲必聯詩社聘一二文章鉅公主之  
四方名士畢至讌賞窮日夜詩勝者輒有厚贈臨川饒  
介為元淮南行省參政豪於詩自號醉樵嘗大集諸名  
士賦醉樵歌簡詩第一贈黃金一餅高啟次之得白金  
三斤楊基又次之猶贈一鎰杜寅字彥正吳縣人史成  
官岐寧衛知事洪武八年番賊既降復叛寅與經歷熊  
鼎俱被害

徐一夔字大章天台人。工文與義。烏王禕善洪武二年八月詔纂修禮書。一夔及儒士梁寅劉子曾魯周子諒胡行簡劉宗弼董彝蔡深勝公琰並與焉。明年書成。將續修元史。禕方為總裁官。以一夔薦。一夔遺書曰。邇者縣令傳命言朝廷以續修元史見徵。且云執事謂僕善叙事。薦之當路。私心竊怪執事何惓惓於不材多病之人也。僕素謂執事知我。今自審終不能副執事之望。何也。近世論史者莫過於日歷。日歷者史之根柢也。自唐

長壽中史官姚璠奏請撰時政記元和中韋執誼又奏  
撰日厯日厯以事繫日以日繫月以月繫時以時繫年  
猶有春秋遺意至於起居注之說亦專以甲子起例蓋  
紀事之法無踰此也往宋極重史事日厯之修諸司必  
闕白如詔誥則三省必書兵機邊務則樞司必報百官  
之進退刑賞之予奪臺諫之論列給舍之繳駁經筵之  
論答臣僚之轉對侍從之直前啟事中外之囊封匭奏  
下至錢穀甲兵獄訟造作凡有關政體者無不隨日以



錄猶患其出於吏牘或有訛失故歐陽修奏請宰相監修者於歲終檢點修撰官日所錄事有失職者罰之如此則日厯不至訛失他時會要之修取於此實錄之修取於此百年之後紀志列傳取於此此宋氏之史所以為精確也元朝則不然不置日厯不置起居注獨中書置時政科遣一文學掾掌之以事付史館及一帝崩則國史院據所付修實錄而已其於史事固甚疎畧幸而天厯間虞集倣六典法纂經世大典一代典章文物粗

備是以前局之史既有十三朝實錄又有此書可以參稽而一時纂修諸公如胡仲申陶中立趙伯友趙子常徐太年輩皆有史才史學厯而成書至若順帝三十六年之事既無實錄可據又無叅稽之書惟憑採訪以足成之竊恐事未必覈也言未必馴也首尾未必穿貫也而向之數公或受官或還山復各散去乃欲以不材多病如僕者承之於後僕雖欲仰副執事之望曷以哉謹奉狀左右乞賜矜察一變遂不至未幾用薦署杭州教

授召修大明日厯書成將授翰林院官以足疾辭賜文綺遣還

趙撝謙名古則更名謙餘姚人幼孤貧寄食山寺與朱右謝肅徐一夔輩定文字交天台鄭四表善易則從之受易定海樂良鄭鄭真明春秋山陰趙倅長於說詩近雨善樂府廣陵張昱工歌詩無為吳志淳華亭朱芾工草書篆隸撝謙悉與為友博究六經百氏之學尤精六書作六書本義復作聲音文字通時目為考古先生洪

武十二年命詞臣修正韻撫謙年二十有八應聘入京  
師授中都國子監典簿久之以薦召為瓊山縣學教諭  
二十八年卒於番禺其後門人柴欽字廣敬以庶吉士  
與修永樂大典進言其師所撰聲音文字通當采錄遂  
奉命馳傳即其家取之樂良字季本迕雨字士霖趙倣  
字本初洪武中官國子監博士以年老乞歸加翰林待  
制張昱字光弼廬陵人仕元為江浙行省左右司員外  
郎行樞密院判官留居西湖壽安坊貧無以葺廬酒間

為瞿佑誦所作詩笑曰我死埋骨湖上題曰詩人張員外墓足矣太祖徵至京憫其老曰可閒矣厚賜遣還乃自號可閒老人年八十三卒吳志淳字主一元末知靖安都昌二縣奏除待制翰林為權倖所阻避兵於鄆朱芾字孟辨洪武初官編修改中書舍人

陶宗儀字九成黃巖人父煜元福建江西行樞密院都事宗儀少試有司一不中即棄去務古學無所不窺出游浙東西師事張翥李孝光杜本為詩文咸有程度尤

刻志字學習舅氏趙雍篆法浙帥台哈布哈南臺御史  
綽羅舉為行人又辟為教官皆不就張士誠據吳署為  
軍諮亦不赴洪武四年詔徵天下儒士六年命有司舉  
人才皆及宗儀引疾不赴晚歲有司聘為教官非其志  
也二十九年率諸生赴禮部試讀大誥賜鈔歸久之卒  
所著有輟耕錄三十卷又葺說郛書史會要四書備遺  
並傳於世顧德輝字仲瑛崑山人家世素封輕財結客  
豪宕自喜年三十始折節讀書購古書名畫彝鼎秘翫

築別業於菑涇西曰玉山佳處晨夕與客置酒賦詩其  
中四方文學士河東張翥會稽楊維禎天台柯九思永  
嘉李孝光方外士張雨于彥成琦元璞輩咸主其家園  
池亭榭之盛圖史之富暨饌館聲伎並冠絕一時而德  
輝才情妙麗與諸名士亦畧相當嘗舉茂才授會稽教  
諭辟行省屬官皆不就張士誠據吳欲強以官去隱於  
嘉興之合溪尋以子元臣為元水軍副都萬戶封德輝  
武畧將軍飛騎尉錢塘縣男母喪歸綽溪士誠再避之遂

斷髮廬墓自號金粟道人及吳平父子並從濠梁洪武  
二年卒士誠之據吳也頗收召知名士東南士避兵於  
吳者依馬孫作字大雅江陰人為文醇正典雅動有據  
依嘗著書十二篇號東家子宋濂為作東家子傳元季  
挈家避兵於吳盡棄他物獨載書兩簾士誠廩祿之旋  
以母病謝去客松江衆為買田築室居焉洪武六年聘  
修大明日厯授翰林編修乞改太平府教授召為國子  
助教尋分教中都踰年還國學擢授司業歸卒於家元



末文人最盛其以詞學知名者又有張憲周砥高明藍  
仁之屬張憲字思廉山陰人學詩於楊維禎最為所許  
負才不羈嘗走京師恣言天下事衆駭其狂還入富春  
山混緇流以自放一日升高呼所親語曰禍至矣亟去  
三日而寇至死者五百家後仕張士誠為樞密院都事  
吳平變姓名寄食杭州報國寺以歿周砥字履道吳人  
僑無錫博學工文詞與宜興馬治善遭亂客治家治為  
具舟車盡窮陽羨山溪之勝其鄉多富人與治善者咸

置酒招砥砥心厭之一日貽書別治夜半遁去游會稽  
歿於兵治字孝常亦能詩洪武時為內邱知縣終建昌  
知府高明字則誠永嘉人至正五年進士授處州錄事  
辟行省掾方國珍叛省臣以明諳海濱事擇以自從與  
論事不合及國珍就撫欲留置幕下即日解官旅寓鄞  
之櫟社太祖聞其名召之以老疾辭還卒於家藍仁字  
靜之弟智字明之崇安人元時清江杜本隱武夷崇尚  
古學仁兄弟俱往師之授以四明任士林詩法遂謝科

舉一意為詩後辟武夷書院山長遷邵武尉不赴內附  
後例徙濠梁數月放歸卒智洪武十年被薦起家廣西  
僉事著廉聲

袁凱字景文松江華亭人元末為府吏博學有才辯議  
論颺發往往屈座人洪武三年薦授御史武臣恃功驕  
恣得罪者漸衆凱上言諸將習兵事恐未悉君臣禮請  
於都督府延通經學古之士令諸武臣赴都堂聽講庶  
得保族全身之道帝敕臺省延名士直午門為諸將說

書後帝慮囚畢命凱送皇太子覆訊多所矜減凱還報  
帝問朕與太子孰是凱頓首言陛下法之正東宮心之  
慈帝以凱老猾持兩端惡之凱懼佯狂免告歸久之以  
壽終凱工詩有盛名性詆諧自號海叟背戴烏巾倒騎  
黑牛游行九峰間好事者至繪為圖初在楊維禎座客  
出所賦白燕詩凱微笑別作一篇以獻維禎大驚賞徧  
示座客人遂呼袁白燕云

高啟字季迪長洲人博學工詩張士誠據吳啟依外家

居吳淞江之青邱洪武初被薦偕同縣謝徽召修元史授翰林院國史編修官復命教授諸王三年秋帝御闕樓啟徽俱入對擢啟戶部右侍郎徽吏部郎中啟自陳年少不敢當重任徽亦同辭乃見許已竝賜白金放還啟嘗賦詩有所諷刺帝嘆之未發也及歸居青邱授書自給知府魏觀為移其家郡中旦夕延見甚歡觀以改修府治獲譴帝見啟所作上梁文因發怒腰斬於市年三十有九明初吳下多詩人啟與楊基張羽徐賁稱四

傑以配唐王楊盧駱云基字孟載其先蜀嘉州人祖宦

吳中生基遂家焉九歲背誦六經及長著書十萬餘言

名曰論鑒遭亂隱吳之赤山張士誠辟為丞相府記室

未幾辭去客饒介所明師下平江基以饒氏客安置臨

濠旋徙河南洪武二年放歸尋起為滎陽知縣謫居鍾

離被薦為江西行省幕官以省臣得罪落職六年起官

奉使湖廣召還授兵部員外郎遷山西副使進按察使

被讒奪官謫輸作竟卒於工所初會稽楊維禎客吳中

以詩自豪基於座上賦鐵笛歌維楨驚喜與俱東語從  
游者曰吾在吳又得一鐵矣若曹就之學優於老鐵學  
也張羽字來儀後以字行本潯陽人從父宦江浙兵阻  
不獲歸與友徐賁約卜居吳興領鄉薦為安定書院山  
長再徙於吳洪武四年徵至京師應對不稱旨放還再  
徵授太常司丞太祖重其文十六年自述滁陽王事命  
羽撰廟碑尋坐事竄嶺南未半道召還羽自知不免投  
龍江以死羽文章精潔有法尤長於詩作畫師小朱徐

賁字幼文其先蜀人徙常州再徙平江工詩善畫山水  
張士誠辟為屬已謝去吳平謫徙臨濠洪武七年被薦  
至京九年春奉使晉冀有所廉訪暨還檢其橐惟紀行  
詩數首太祖悅授給事中改御史巡按廣東又改刑部  
主事遷廣西參議以政績卓異擢河南左布政使大軍  
征洮岷道其境坐犒勞不時下獄瘐死

王行字止仲吳縣人幼隨父依賣藥徐翁家徐媼好聽  
稗官小說行日記數本為媼誦之媼喜言於翁授以論



語明日悉成誦翁大異之俾盡讀家所有書遂淹貫經史百家言未弱冠謝去授徒齊門名士咸與交富人沈萬三延之家塾每文成酬白金鎰計行輒麾去曰使富而可守則然臍之慘不及矣洪武初有司延為學校師已謝去隱於石湖其二子役於京行往視之涼國公藍玉館於家數薦之太祖得召見後玉誅行父子亦坐死始吳中用兵所在多列礮石自固行私語所知曰兵法柔能制剛若植大竹於地繫布其端礮石至布隨之低

昂則人不能害而礮石無所用矣後常遇春取平江果如其法行亦自負知兵以及於禍云初高啟家北郭與行比隣徐賁高遜志唐肅宋克余堯臣張羽呂敏陳則皆卜居相近號北郭十友人稱十才子啟賁遜志羽自  
有傳唐肅字處敬越州山陰人通經史兼習陰陽醫卜書數少與上虞謝肅齊名稱會稽二肅至正壬寅舉鄉試張士誠時為杭州黃岡書院山長遷嘉興路儒學正士誠敗例赴京尋以父喪還洪武三年用薦召修禮樂

書擢應奉翰林文字其秋科舉行為分考官免歸六年  
謫佃濠梁卒子之淳字愚士宋濂亟稱之建文二年用  
方孝儒薦擢翰林侍讀與孝孺共領修書事卒於官謝  
肅官至福建僉事坐事死宋克字仲溫長洲人偉軀幹  
博涉書史少任俠好學劍走馬家素饒結客飲博迨壯  
謝酒徒學兵法周流無所遇益以氣自豪張士誠欲羅  
致之不就性抗直與人議論期必勝援古切今人莫能  
難也杜門染翰日費十紙遂以善書名天下時有宋廣

字昌裔亦善草書稱二宋洪武初克任鳳翔同知卒堯  
臣字唐卿永嘉人入吳為士誠客城破例徙濠梁洪武  
二年放還授新鄭丞呂敏字志學無錫人元時為道士  
洪武初官無錫教諭十三年舉人才不知其官所終陳  
則字文度崑山人洪武六年舉秀才授應天府治中俄  
擢戶部侍郎以閱實戶口出為大同府同知進知府  
孫賁字仲衍廣東順德人性警敏書無所不窺詩文援  
筆立就詞采爛然負節槩不妄交游何真據嶺南開府

辟士與王佐趙介李德黃哲竝受禮遇稱五先生廖永忠南征黃為真草降表永忠辟典教事洪武三年始行科舉黃與其選授工部織染局使遷虹縣主簿兵燹後黃勞徠安輯民多復業居一年召為翰林典籍與修洪武正韻九年遣監祀四川居久之出為平原主簿坐累逮繫俾築京師望都門城垣黃謳吟為粵聲主者以奏召見命誦所歌詩語皆忠愛乃釋之十五年起為蘇州經歷復坐累戍遼東已大治監玉黨黃嘗為玉題畫遂

論死臨刑作詩長謳而逝時門生黎貞亦戍遼東黃屍  
乃得收歛貞字彥晦新會人工詩文嘗為本邑訓導以  
事被誣戍遼陽十八年從游者甚衆放還卒黃所著有  
通鑑前編綱目孝經集善理學訓蒙及西菴集和陶集  
多佚不傳番禺趙純稱其究極天人性命之理為一時  
儒宗云王佐字彥舉先河東人元末侍父官南雄經亂  
不能歸遂占籍南海與黃結詩社構辭敏捷佐不如黃  
句意沉著黃亦不如佐何真使佐掌書記參謀議真歸

朝佐亦還里洪武六年被薦徵為給事中太祖賜宋濂黃馬復為歌命侍臣屬和佐立成性不樂樞要將告歸時告者多獲重譴或尼之曰君少忍獨不虞性命邪佐乃遲徊二年卒乞骸歸趙介字伯貞番禺人博通六籍及釋老書氣豪邁無仕進意行以囊自隨遇景賦詩投其中日往來西樵泉石間有司累薦皆辭免洪武二十二年坐累逮赴京卒於南昌舟次四子潔絢繹純皆善詩文工篆隸絢隱居不出有父風純仕御史李德字仲

修番禺人洪武三年以明經薦授洛陽典史厯南陽西  
安二府幕官竝能其職以年衰乞改漢陽教諭秩滿調  
義寧義寧在粵西荒陋甚德為振舉文教漸興解官歸  
卒德初好為詩晚究洛閩之學謂誠意為古聖詰心要  
故嶺南人稱理學必曰李仲修云黃哲亦番禺人厯仕  
州郡以治行稱

王蒙字叔明湖州人趙孟頫之甥也敏於文不尚槩度  
工畫山水兼善人物少時賦宮詞仁和俞友仁見之曰



此唐人佳句也遂以妹妻焉元末官理問遇亂隱居黃鶴山自稱黃鶴山樵洪武初知泰安州事蒙嘗謁胡惟庸於私第與會稽郭傳僧知聰觀畫惟庸伏法蒙坐事被逮瘐死獄中郭傳一名正傳字文遠洪武七年帝御武樓賜學士宋濂坐謂曰天下既定朕方垂意宿學之士卿知其人乎對曰會稽有郭傳者學有淵源其文雄贍新麗其議論根據六經異才也既而濂持其文以進帝召見於謹身殿授翰林應奉直起居注遷兵部主事

再遷考功監丞進監令出署湖廣布政司叅政

明史卷二百八十五

欽定四庫全書

明史卷二百八十五考證

蘇伯衡傳坐表箋誤下吏死

臣章宗瀛按表箋一事

明實錄未載開國臣傳則云伯衡卒於家未知孰是  
謹識以闕疑

王冕傳授詔議叅軍一夕病卒

臣章宗瀛按是時胡

大海攻紹興屯兵九里山延冕問策冕曰越人秉義  
若為義誰敢不服若為非義誰則非敵明日遂不起

初未嘗為諮議叅軍也朱彞尊以冕為元季逸民辯  
其未嘗叅軍叅軍事見元詩小選傳與傳互異謹附  
識

戴良傳飲泣賦詩情詞悽惻

臣章宗瀛按海巢集云

鶴年嘗有詩云行踪不逐鳥東徙心事惟隨雁北飛  
人多悲其故君之思謹附識

趙堦傳吳印者僧也

臣

章宗瀛按開國臣傳吳印本

鍾山寺僧明祖奇其才命與宗泐同蓄髮欲官之宗

泐辭印獨受官其兄昭亦官至布政使謹附識

高啓傳啓嘗賦詩有所諷刺帝嫌之

臣章宗瀛按朱

志居詩話啓嘗作題宮女圖詩有云小犬隔花空吠  
影夜深宮禁有誰來為明祖所猜其賈禍蓋以此即  
傳所謂賦詩諷刺也謹附考





總校官編修臣吳紹濂